

越
史
略







越 史 略

撰 人 不 詳

編主五雲王

編初成集書叢

越 史 略

中華民國二十五年十二月初版

發行人

王 雲 五
上海河南路

印刷所

商 務 印 書 館
上海河南路

發行所

商 務 印 書 館
上海及各埠

(本書校對者董文淵)

四庫全書提要

越史略三卷。不著撰人名氏。紀安南國事。上卷曰國初沿革。爲趙佗以下諸王。曰歷代守任。爲西漢至石晉交州牧守姓名。曰吳紀。乃五代末吳權及其子昌岌昌文等事蹟。曰十二使君。乃昌文沒後。牙將杜景碩等爭立事蹟。曰丁紀。則丁部領以下諸王。曰黎紀。則黎恒以下諸王。中卷。下卷。皆曰阮紀。則自李公蘊得國後諸王事蹟。紀述特詳。惟以李爲阮。與史不合。案黎削安南志略稱陳氏代立。凡李氏宗族及齊民姓李者。皆令更爲阮。以絕民望。則此書當爲陳氏之臣所作。崩志又載陳普嘗作越志。黎休嘗修越志。俱陳太王時人。太王者。陳日煚之諡。則此書或卽出普休二人手。未可知也。安南自漢迄唐。並爲州郡。五季末爲土豪竊據。宋初始自立國。此書自唐以前。大抵全襲史文。自丁部領以下。則出其國人之詞。與史所載殊有同異。蓋史臣但承赴告之辭。故如薨卒之類。往往較差一年。至名號官爵。或祇自行國中。而不以通於大朝。故亦有所錯互。其牴牾之處。頗可與正史相參證。又史稱陳日尊自帝其國。尊公蘊爲太祖神武皇帝。國號大越。此書原題大越史略。蓋舉國號爲名。而所列公蘊至吳昆八王。皆僭帝號。不獨陳日尊一代。則尤史所未詳。又玉海記交趾天貺寶象神武彰聖嘉慶諸年號。此書皆與相合。特所列黎阮諸王。無不改元者。而史家並未悉載。則必當時深自諱之。故中國不能盡知耳。書末又載陳日煚以下紀年一篇。但錄所僭諡號改元。而不具事蹟。

其中所稱太上者。以史按之。當爲陳叔明。其稱今上者。當爲陳煒。而史載日昃至燁十二世。此書乃僅得十世。未詳其故。又考廉州府志。紀康熙十三年。海濱得鐘。題皇越昌符九年乙丑。說者疑爲宋時李乾德以後僭號。今此書稱今上昌符元年丁巳。當明洪武十二年。其九年正值乙丑。則爲陳煒僭號無疑。是亦足資考證矣。安南自宋以後。世共職貢。乃敢乘前代失馭之際。輒竊號國中。至著之簡策。以妄自誇大。實悖謬不足採。然吳楚僭王。春秋絕之。而作傳者亦不沒其實。故特依僞史例。錄之以著其罪。且以補宋元二史外國傳之所未備焉。

越史略卷一

國初沿革

昔黃帝既建萬國。以交趾遠在百粵之表。莫能統屬。遂界於西南隅。其部落十有五焉。曰交趾、越裳氏、武寧、軍寧、嘉寧、寧海、陸海、湯泉、新昌、平文、文郎、九真、日南、懷驩、九德。皆禹貢之所不及。至周成王時。越裳氏始獻白雉。春秋謂之闕地。戴記謂之雕題。至周莊王時。嘉寧部有異人焉。能以幻術服諸部落。自稱確王。都於文郎。號文郎國。以淳質爲俗。結繩爲政。傳十八世。皆稱確王。越勾踐嘗遣使來諭。確王拒之。周末。爲蜀王子泮所逐而代之。泮築城於越裳。號安陽王。竟不與周通。秦末。趙佗據鬱林、南海、象郡。以稱王。都番禺。國號越。自稱武王。時安陽王有神人曰臯魯。能造柳弩。一張十放。教軍萬人。武皇知之。乃遣其子始爲質。請通好焉。後王遇臯魯稍薄。臯魯去之。王女媚珠。又與始私焉。始誘媚珠。求看神弩。因毀其機。馳使報武皇。武皇復興兵攻之。軍至。王又如初。弩折。衆皆潰散。武皇遂破之。王銜生犀入水。水爲之開。國遂屬趙。

趙紀

武帝

諱佗。姓趙氏。漢真定人。秦始皇三十三年。已併天下。略定揚粵。以任囂爲南海尉。佗爲龍川令。至二世時。囂死。以佗代囂。秦滅。佗并有桂林、象郡之地。自立爲南越王。漢高祖既定天下。遣陸賈奉璽綬往。拜佗爲

南越王。漢高后五年。王自卽皇帝位。發兵攻長沙。招撫甌駱閩粵皆屬焉。有地東西萬餘里。御黃屋左纛。漢文帝立。復遣陸賈遺書問之。賈至。王慚謝。請復爲藩王。長供貢職。至漢武帝建元之年薨。諡曰武帝。在位十八年。孫胡立。是爲文王。

文王

諱胡。武帝孫也。漢武帝時。嘗遣子嬰齊入侍。後王薨。諡曰文王。子嬰齊立。是爲明王。

明王

諱嬰。齊文王子也。初爲太子。入宿衛於漢。在長安娶繆氏女。生子興。及文王薨。至是卽位。立繆氏爲后。興爲太子。漢元鼎四年。王薨。諡曰明王。子興立。是爲哀王。

哀王

諱興。明王子也。初卽位。尊母繆氏爲太后。太后未嫁於明王。時嘗與霸陵人安國少季通。及卽位。漢遣少季來諭王入朝。太后復與少季通。遂勸王入朝。其相呂嘉數諫止王。王不聽。太后恐嘉不從。置酒欲誅嘉。嘉知之。陰與大臣謀作亂。漢武帝聞嘉不聽。乃使韓千秋等將兵二千人以攻嘉。嘉乃與其弟及國人攻弑王及太后。盡殺漢使者。迎明王長子術陽侯立之。而諡曰哀王。

術陽王

諱建德。哀王庶兄也。元鼎五年十一月。其相呂嘉出兵擊韓千秋等。盡殺之。函封漢使節置境上。元鼎六

年。漢以路博德爲伏波將軍。出桂陽。下湟水。楊僕爲樓船將軍。出豫章。下橫浦。以歸義侯二人爲戈船。下瀨將軍。出零陵。下瀨水。馳義侯。因巴蜀罪人。發夜郎兵。下牂柯江。同會番禺。以攻嘉。嘉及王遁入海。博德使人追之。擒王及嘉。時戈船下瀨兵未下。而越地已平矣。遂分其地爲九郡。南海、蒼梧、今梧鬱林、合浦、今交趾、九真、今清日南、今又安府、珠崖、儋耳、今儋州。

右趙自武帝至術陽王。凡五主。始丁巳。終庚午。共七十四年而亡。自漢武帝元封元年以後。皆北人除授。

歷代守任。

石戴、漢武帝時人。

周章、漢昭帝時人。

魏朗子明、漢宣帝時人。

蘇定、漢光武帝時人。

馬援

後漢光武建武十六年。薺泠縣人徵側、雒將之女也。嫁爲朱鳶縣人詩索妻。性甚雄勇。所爲不法。太守蘇定繩之以法。側怒。乃與其妹貳起峰州兵。攻陷郡縣。九真、日南皆應之。略定漢南外六十五城。自立爲王。都薺泠。十七年。漢拜馬援爲伏波將軍。以擊之。十八年。援緣海而進。隨山刊道。千有餘里。至浪泊上。與側

戰。側不能支。退保禁溪。十九年。側益困。遂走。爲援所殺。追擊其餘黨。至居風降之。乃立銅柱爲極界。分其地爲封溪、望海二縣。援又築爲繭城。其圓如繭。二十一年秋。援還漢。

周敞、順帝時爲刺史。

張喬

順帝永和三年。象林蠻區憐反。攻殺長吏。以喬爲刺史。喬至。慰諭。並皆降散。

夏方

桓帝延熹三年。九真復反。拜方爲刺史。冬十一月。賊衆二萬餘人皆來降。

劉操、桓帝時人。

周隅、靈帝時人。

朱儁

靈帝光和四年。夏四月。烏澹蠻爲亂。州人梁龍等因之以反。有衆數萬人。帝命儁擊破之。以儁爲刺史。

賈琮

靈帝中平元年。州人屯兵執刺史。帝以琮爲刺史。琮至。爲撫輯之。州境乃安。百姓歌曰。賈父來晚。使我先反。今見清平。吏不敢飯。琮任事三年。拜爲議郎。

阮進、漢中平中爲刺史。

士燮

燮字彥威。蒼梧廣信人。父賜。桓帝時爲日南太守。燮少遊學漢東。好左氏春秋。爲之註解。又通尚書大義。父喪。闋舉茂材。除巫令。遷交州太守。謙恭下士。漢避亂者多往依焉。獻帝聞其賢。賜璽書褒諭。以爲綏南中郎將。領交州太守如故。建安末。燮遣子廡質於吳。又以珠、貝、犀、象及香果之珍美者。遺孫權。權嘉之。封龍編侯。弟三人。壹、鮪、武。並爲郡長。燮旣學問優博。又達於從政。處大亂之世。保全一方。二十餘年。疆場無事。民皆樂業。威尊無上。出入鳴鍾磬。備禮儀。笳、簫、鼓、吹。闐、咽、道、路。嘗有數十妻。居輜中。當時貴重。威震南蠻。尉佗不足數也。魏黃初七年。王薨。壽九十。在治四十餘年。孫權聞王死。析合浦以北屬廣州。呂岱爲刺史。合浦以南爲交州。戴良爲刺史。以陳時代王爲太守。王子徽等發兵共拒良。後呂岱皆以計誅之。傳首武昌。

戴良、吳人。

呂岱、吳人。

陸允、吳人。

孫謂、吳人。

鄧荀

先是吳以孫謂貪暴爲民患。故使荀督察之。荀至。擅調孔雀三十頭送建業。民憚遠不去。與郡史吳興殺

謂及荀。

吳興

霍弋

馬融

楊稷

劉俊

陶璜

晉武帝泰始三年。孫皓遣陶璜等攻楊稷。不克。遂襲董元營。獲其寶物。船載而歸。以璜領州督。璜又擊元。殺之。稷以其將王素代元。璜又陷其州。因以璜爲刺史。後璜見徵爲武昌督。時吳王已降於晉。晉詔璜復其本職。封宛陵侯。卒。璜在州三十年。恩威交著。及卒。舉州號哭。如喪父母。

吾彥代璜爲刺史。

顧秘代吾彥爲刺史。

陶威璜子。

陶淑威弟。

陶綏淑子。

陶侃

晉元帝大興元年十一月詔加侃廣州刺史都督交州諸軍事。

王諒

晉元帝永昌元年以諒爲刺史使收梁碩碩圍諒於龍編奪諒節諒不與乃斷右臂而取之諒死明帝太
寧元年遣將軍高寶攻碩斬之。

阮放晉成帝時爲刺史。

阮敷穆帝時爲刺史。

朱輔秦符堅時爲刺史。

阮遜

杜瑗

晉孝武帝太元五年九真太守阮遜據州叛六年杜瑗斬遜州境乃平。

杜惠度

瓊子也義熙七年永嘉太守盧循來奔攻破合浦徑向州治晉帝以惠度爲刺史惠度率府兵擊破之於
石碕又與循戰於龍編南津惠度以雉尾炬燒其船夾岸射之循兵大潰循溺水死惠度取其屍斬之函
首詣建康孝武帝初元元年七月林邑入寇惠度擊破之林邑乞降惠度爲政民畏而愛之城門夜開道

不拾遺。

杜宏文、惠度子。

王徽代宏文爲刺史。

檀和之

宋文帝元嘉二十三年。命刺史檀和之討林邑。南陽人宗慤。性好武事。嘗言願乘長風破萬里浪。及和之伐林邑。毅然請行。以慤爲振武將軍。林邑王范陽邁。聞軍出。上表請還所掠地。和之進軍圍林邑。將范伏龍於區粟城。宗慤擊破之。五月。拔區粟城。斬伏龍。乘勝入象浦。陽邁傾國來戰。以甲被象。前後無際。宗慤又爲獅子形以拒之。象果驚走。林邑兵大敗。陽邁遁去。二十四年。和之還北。

劉牧、宋明帝時刺史。

劉勃

阮長仁、宋明帝時刺史。

沈煥、齊高帝時刺史。

阮叔獻

叔獻、長仁之從子。長仁卒。叔獻代領州事。以號令未行。求刺史於宋。宋以沈煥爲刺史。以叔獻爲武平、新昌、二郡太守。叔獻旣得朝命。遂發兵守險。不納煥。煥停鬱林。病卒。齊高帝建元元年。以叔獻爲刺史。叔獻

既受命。乃斷絕貢獻。永明三年。命劉楷爲刺史。以討叔獻。叔獻懼。間道還朝。

劉楷、齊高帝時刺史。

房法宗、齊明帝時刺史。

伏登之

法宗長史也。以法宗多病。囚之別室。而奪其權。法宗好讀書。在囚中求書觀之。登之曰。使君安居。猶恐動疾。豈可看書。竟弗與。齊以登之爲刺史。法宗還。過嶺而卒。

阮凱、齊明帝時刺史。

阮晏、梁人。凱叛。晏斬之。代爲刺史。

侯諮、梁武帝時刺史。

楊暕

初州人阮賁反。據龍編城。自稱南越帝。置百官。改元天德。國號萬春。梁武帝拜暕爲交州刺史。陳霸先爲司馬。以擊賁。賁率衆三萬拒之。敗於朱鳶。又敗於蘇歷江口。賁奔嘉寧城。暕進軍圍之。賁奔之新昌獠中。又率衆二萬出屯典澈湖。大造船艦。充塞湖中。是夜江水暴漲。霸先率所部兵隨流先進。諸軍鼓譟以從。賁不爲備。因大潰。退保屈獠洞。病卒。餘黨畏霸先兵勢。乃舉衆就降。賁子天寶入九真。霸先舉兵討平之。以九真爲愛州。

陳霸先

以討阮賁之功。授兵威將軍交州刺史。尋徵還北。

劉方

隋文帝仁壽二年。州帥阮佛子據越王城作亂。兄子大權據龍編。文帝以方爲行軍總管以討佛子。佛子懼請降。煬帝大業中以林邑反。帝改日南爲驩州。以方爲驩州道行軍總管。以討林邑。方軍至閩梨江。林邑兵皆騎巨象。四面而至。方乃多掘小坑。草覆其上。旣戰僞北。林邑逐之。象多陷死。因以銳師繼之。林邑大敗。俘馘萬計。方追之。屢戰皆捷。過馬援銅柱南八日。至其國都。林邑王梵志棄城遁。方入城。獲廟主十八。皆鑄金爲之。方刻石紀功而還。道病卒。

邱和

唐高祖武德五年。授和大總管。爵譚國公。和復奏置都督府主。

劉延祐

唐高宗調露元年。改交州刺史爲安南都護府。以延祐爲都護。舊俚戶歲半租。延祐責令全入。衆始怨。延祐誅其渠。李嗣僊餘黨遂叛。圍府城。殺延祐。

曲覽

中宗時爲都護。以貪暴失衆心。爲司錄甘猛所殺。

張順。肅宗時爲都護。

張伯儀

張順子。肅宗至德二載。改安南曰鎮南都護府。以伯儀爲都護。代宗大歷二年。張伯儀更築羅城。三年。復爲安南都護府。

高正平。代宗時爲都護。

趙昌

代正平爲都護。德宗貞元七年。昌奏置柔遠軍。

裴泰

代昌爲都護。爲府人王季元所殺。以趙均爲都護。

趙均

李象古

憲宗時爲都護。爲府人楊清所殺。

阮元喜

穆宗長慶二年。以元喜爲安南都護。以城門有逆水。恐州人多出反叛。因卜今城。時方築小城。相者卜曰。君力不足。修大城。五十年後。必有高人於此定都建府也。至咸通中。高駢乃增築羅城。

韓約朗州武林人本名重革。

文宗太和中廢州都督咸屬安南都護府以約爲都護。

武渾武宗時人。

裴元祐武宗時人。

阮涿宣宗時爲都護經略使。

王式

父起王楷之弟也擢進士第式巧於仕宦遷殿中侍御史大中中爲晉州刺史徙安南都護。

李鄂

宣宗大中十二年代王式爲都護十二月土蠻引南詔兵襲本府陷之鄂奔武州二年鄂集土兵攻羣蠻復取府城懿宗責其失守貶儋州司戶咸通中罷安南都護府置行交州於海門鎮尋復之。

王寬代鄂爲都護。

蔡襲

懿宗咸通中南詔率蠻來寇懿宗以湖南觀察使蔡襲代王寬仍發單滑徐汴荆襄潭鄂諸道兵以擊之蠻遂引去時嶺南節度使蔡京忌襲功成罷戍兵襲以蠻寇未定兵疲食盡作十必死狀申於中書省時相信京言終不省四年春正月南詔復率蠻兵五萬來攻復陷府城援兵不至襲左右皆徒步力戰身中

十矢欲下船不及。溺水而死。荆南虞候元惟德謂其衆曰：「吾輩無船，入水則死，不若還向城。」與蠻人鬪，以一身易二蠻，亦爲有利。遂自東羅門入，蠻不爲備，惟德縱兵擊之，殺二千餘人。明日，蠻將楊思進出戰，惟德死之。蠻所殺虜凡五十萬人，留兵二萬人。懿宗召還諸道兵，罷安南都護府，置行交州於海門鎮。以宋戎爲交州刺史。七月，復置都護府。咸通五年，以容管經略使張茵勾當安南軍府事。茵逗遛不進，夏侯薦高駢以代茵。

高駢

駢字千里，崇文之孫也。世在軍中，折節讀書，好談論古人，少事朱叔明。有二鵬並飛，引弓祝之曰：「我且貴。」當中之，一發而二鵬俱貫，衆大驚，號落鵬侍御。以功遷秦州防禦使。時南詔盡有交州地，咸通五年，駢以驍衛將軍爲安南都護府經略招討使，悉以張茵所將兵委之。九月，駢至南峯州，蠻衆五萬，方穫秋稻，駢掩擊，大破之。遂進攻南詔，又破之，殺其將段曾，遷及土蠻兵，斬首三萬餘級，乃廢都護府，置靜海軍。以駢爲節度使。駢據本州稱王，自羣蠻爲寇，殆十年，至是乃安。駢修築羅城，周回一千九百八十丈，零五尺，高二丈六尺，脚廣二丈六尺，四面女牆，高五尺五寸，敵樓五十五所，門樓五所，甕門六所，水渠三所，踏道三十四所，又築堤，周回二千一百二十五丈八尺，高一丈五尺，脚闊三丈，又造屋五千餘間。高駢以我州至邕、廣海路，多潛石覆舟，漕運不通，遂命長吏林諷等疏鑿。夏四月五日起役，踰月之間，將欲開達，但中間值巨石綿亘者數丈，堅硬如鐵，刀下刃卷，斧施柯折，役者相顧，殆幾中止。五月二十六日，當晝，黑雲滃興。

怒風暴作。俄而轟雷大發。連震數聲。倏爾開霽。而巨石已破碎矣。但餘兩處。至六月二十一日。復大震如初。而巨石一時瓦裂。事畢。因命其處曰天威涇。九年。懿宗以駢爲石金吾大將軍。加檢校尙書右僕射。徙天平節度使。尋卒。

高鄴

駢之從孫。懿宗朝。駢以鄴嘗爲先鋒。薦之。代領我州。

曾充

僖宗時代。高鄴爲節度使。以撫字有聲。州人呼曾尙書。撰交州記一篇。

朱全昱、全忠兄。代袞爲節度使。

獨孤損

昭宗時爲宰相。哀帝授靜海節度使。以代全昱。州人號爲嶽尙書。

曲顯、梁開平元年。代損爲節度使。

曲全美

顯弟也。明宗時代。顯爲節度使。後爲南海將梁克真所執。送南漢。以阮進代之。

阮進

後唐明宗長興元年。南漢主劉龔。遣其將梁克真等來伐我州。擒節度使曲全美。以其將阮進代之。

楊廷藝

愛州人。唐明宗長興中，廷藝發兵攻阮進，進逃歸。廷藝自稱節度使。晉天福二年，爲矯公羨所殺。

矯公羨

峯州人。後晉高祖天福二年春三月，羨殺廷藝而代之，後爲吳王所殺。

右歷代守任。自西漢武帝元封元年辛未，至石晉高祖天福三年戊戌，凡一千四十八年。而吳始興，或北人除授，或本國自稱，無慮百餘人。見記者八十三人。

吳紀

前吳王

諱權，姓吳氏，先府之子也。事楊廷藝爲將軍。後晉高祖天福三年冬十二月，權自愛州舉兵攻公羨。公羨使人求救於南漢劉龔，以其子萬王宏操爲靜海軍節度使，將兵救公羨。宏操舟師自白藤江入，欲攻權，而權已殺公羨矣。權聞宏操至於海口，潛植鐵頭大杙，及漲潮，使以小舟挑戰，而陽北。宏操追之，潮退杙露，宏操拒戰不暇，而潮落甚急，舟盡礙於杙內，權奮擊大破之，溺死過半。殺宏操，權始稱王，以晉出帝開運元年王薨，在治凡七年。

楊平王

諱主將，姓楊氏，前吳王家臣也。吳王薨，自立爲王。吳王子昌岌奔茶鄉，范令公家主將以其弟昌文爲己

子昌文弟南興、乾興皆幼。久之，主將使人將兵至，令公家索昌岌，令公懼。匿昌岌於洞中。後漢隱帝乾祐三年，主將遣昌文及楊杜二使將兵攻太平、唐阮二村，行至慈廉。昌文謂二使曰：「我先王之德，洽於民心，不幸違棄羣臣，主將自行不義，罪甚大焉。今又使我往伐無辜之邑，幸而勝之，彼終不服，爲之奈何？」二使曰：「唯命是聽。」遂反兵襲平王，克之。昌文以平王與己有恩，乃降於張陽，使食其邑。平王在位七年。

後吳王南晉天策

南晉諱昌文，吳王權之第二子也。以漢乾祐三年廢楊平王而自立，稱南晉。至周太祖廣順元年，遣使迎其兄昌岌，與之更相爲政。岌稱天策，時有華閭洞人丁部領，負谿山險固，不修臣職。二王欲討之，部領懼，遣其子璉入貢。璉至，二王責其不庭，執璉而往征之。踰月不克，王乃懸璉竿上，謂部領曰：「不降，卽殺之。」部領怒曰：「大丈夫豈以兒子之故累大事耶？」遽命十餘弓射璉。二王驚異，乃班師焉。時天策擅作威福，而南晉不復預政矣。顯德元年，天策薨。南晉王遣使於漢，劉鋹以王爲靜海節度使。宋太祖乾德三年，王率師攻太平、唐阮二村。王船上觀戰，爲伏弩所中而薨。時十二使君並起，各據州郡自治。天策在位三年，南晉十三年。顯德、周世宗年號。

右前吳王至後吳王，凡三主，始戊戌，終乙丑，共二十八年而亡。

十二使君

矯三制，名公桿，據峯州。

阮太平、名寬、一名記、據阮家。

陳公覽、名日慶、據唐林。

杜景公、名景碩、據杜洞。

阮遊奕、名昌識、據王槁。

阮郎公、名珪、據超類。

阮令公、名守捷、據仙遊。

呂左公、名獷、據細江。

阮右公、名超、據扶列。

矯令公、名順、據洄湖。

范防遏、名白虎、據藤州。

陳明公、名覽、據江布口。

右十二使君。始乙丑。終丁卯。凡三年。而丁先王始併。

丁紀

先王

諸部領。姓丁氏。華閩洞人。少孤。與母媪。五人居山神祠側。門外有山。荷叢葉上。蝸迹成天子字。王爲兒時。

與羣童牧牛於山野。皆推爲衆兒長。以君臣禮事之。相與嬉戲。則共交手爲椅以捧王。又取蘆花爲前導。以左右引象。天子隊仗。暇日羣兒相率摘柴以供役課。晚歸其母。母見之喜。爲烹豚以饗之。鄉中父老皆相戒曰。此兒器宇非常。必能濟世安民。我輩若不早附。異日必悔其晚。率子弟往從之。居於澗澳柵。其叔獨據柵不從。王率衆攻之。不勝。奔至潭家灣。橋壞。陷於潭。叔欲刺之。見二黃龍覆其上。叔懼而退。乃降。時境內無主。王聞陳明公賢而無嗣。乃以其子往依焉。明公一見。爲器重之。養爲己子。盡付以所部兵。使攻十二使君。皆平之。戊辰。明公卒。京府吏民多往歸之。王以趙宋太祖開寶元年。稱皇帝於華閩洞。起宮殿。制朝儀。置百官。立社稷。尊號曰大勝明皇帝。置大鼎於庭。養虎於檻。下令曰。有犯法者受烹噬之罪。人皆懾伏。不敢違命。

己二年。閏五月。封長子璉爲南越王。

庚三年。改元曰太平元年。宋封王爲安南郡王。立王后五人。有年號自此始。

辛未。太平二年。置文武僧道階品。以劉某爲都護府。太師阮匄爲定國公。黎桓爲十道將軍。宋聞王稱尊號。

使遣王書。其略曰。中夏之於蠻貊。猶人之有四肢也。苟心腹未安。四體庸能治乎。蕞爾交州。遠在天末。唐

季多難。未遑區處。今聖朝蓋覆萬國。太平之業。亦旣成矣。俟爾至止。康乎帝躬。爾毋向隅。爲我小患。俾我

爲絕躡斷節之計。用屠爾國。悔其焉追。

壬申。太平三年。封子璿爲衛王。立季子項郎爲太子。命阮子猷如宋修好。

甲 太平五年王得讖曰杜釋弑丁丁黎家出聖明競頭多橫死道路絕人行

丙 太平七年

己 太平十年春越王璉使人殺太子項郎冬十一月王夜宴爲福侯宏杜釋所弑及越王璉等先是釋爲桐關吏夜臥橋上見流星入口釋以爲休徵遂萌弑逆之心王旣遇害釋潛入宮中匿於雷下踰三日渴甚以手盛雨水而食宮女見之告定國阮匄收斬之與其將軍黎桓奉衛王璿卽皇帝位追尊王爲先王母爲太后王在位十一年壽五十五改元者一

衛王

諱璿先王次子也先王爲杜釋所弑阮匄黎桓共奉衛王卽皇帝位二年秋七月宋人伐我衆以璿幼弱共推黎桓爲帝降璿爲衛王右丁先王至衛王共二主始戊辰終庚辰凡十三年而亡

黎紀

大行王

諱桓姓黎氏長州人也父覓母鄧氏初懷娠夢腹生蓮花俄而結實收之分與人食及寤莫識其故以天福元年七月十五日生王母見其手色異常語人曰此兒長成恐吾不及享其祿矣逾數年而父母俱亡本州有黎觀察者見而異之養爲己子王遇冬寒覆脊而臥觀察視之見有黃龍覆其上由是益奇之及

長事南越王璉。先王嘉其勇智，累遷至十道將軍。殿前指揮使。太平十年，先王遇弒，衛王尙幼，王乃攝行國政，稱爲副王。阮匐、丁佃以王將不利於孺子，乃相率起兵。王出師攻之，斬佃於陣，執匐送京師殺之。衛王二年，宋太常博士侯仁寶請兵伐本國。宋以仁寶爲交州路轉運使，領諸軍來攻。時諒州聞兵至，以狀聞。太后命南柵人范巨備爲大將軍，率師拒之。師出之日，巨備直入省中，謂王曰：「今主上幼弱，未知我輩勤勞，脫有尺寸之功，其誰知之？不如先策十道爲天子，然後出師。」軍士聞之，咸呼萬歲。太后見人情悅服，使以龍袞加王躬，請卽位。庚辰之年，王卽位，封父爲長興王，母鄧氏爲太后。

辛巳。天福元年春三月，侯仁寶軍至浪山，陳欽祚至西結，劉澄至白藤江，王自將拒之，植杙捍江，宋兵退保寧江。王令詐降以誘仁寶，北軍敗，擒斬之。欽祚等聞軍敗，引退。上尊號爲明乾，應運神武昇平至仁廣孝皇帝。

壬午。天福二年立五王后，王遣徐穆等使占城，爲所執。王怒，自將討之，斬其王篋眉，稅於陣，俘馘不可勝數，獲宮妓數百人，遷其重器，收金銀寶貨以萬數，滅其城池，毀其宗廟，是歲還京。大饑。

癸未。天福三年，初王征占城，經銅鼓山至婆和，以海路險阻，難於去來，使開渠，由是舟楫乃通。

甲申。天福四年，造百寶千歲殿於火雲山，其柱裹以金銀，東建風流殿，西建榮華殿，左建蓬萊殿，右建極樂殿，次構火雲樓，連起長春殿，其側起龍祿殿，蓋以銀瓦。

乙酉。天福五年秋七月丁巳，王之誕辰也，使造舟江中，以竹作假山於舟上，號南山，遂設競渡禮。

戊天福六年。宋授王靜海軍節度使。

亥天福七年。王初耕籍田於隄山。得金銀甕一。耕於幡悔山。得甕一名。其地曰金銀田。

子天福八年。

丑天福九年。管甲楊進祿以驩。愛二州。附占城。王親征擒之。復取二州。封第三子爲南封王。

寅興統元年。春。正月。改元曰興統。宋命左正言宋鎬來封王。

卯興統二年。封弟之子爲禦蠻王。居峯州。

辰興統三年。春。王御乾元樓觀燈。

午興統五年。封第十一子爲行軍王。居北岸吉覽州。

未應天元年。正月。改元。命杜亨使於宋。封義子爲扶帶王。居扶帶。

申應天二年。王親征麻黃。大發舟波。三洞。拔之。

酉應天三年。秋。七月。王征杜洞江賊擒之。大水。

戌應天四年。

己應天五年。王親討何洞之十九州。平之。

庚應天六年。討峯州賊鄭航。擒之。命劉紹如宋。

辛應天七年。征莒隆賊。賊見王張弩注矢。欲射之。矢尋墜。再舉絃斷。懼而退。王御樓船入窮江。追之。賊陳

於兩岸與王拒戰。王兵陷於江。衛王璿中流矢死。王呼天三聲。賊自敗。

壬寅。應天八年。造銀兜鍪數千餘頂。頒賜軍人。

癸卯。應天九年。王幸驩州。鑿多蓋港。直至暗州。

甲辰。應天十年。王拔智得巨蛇。忽然逆流而去。遣行軍王如宋。

乙巳。應天十一年。王薨於長春殿。謂之大行王。因爲廟號。在位二十七年。壽六十五。改元者三。葬長州德陵。

中宗

諱龍鉞。大行第三子也。母初侯姨女。九歲。封南封王。大行初薨。王與東城王、中國王、開明王爭立。九閱月。國中無主。東城王敗。奔占城。爲所殺。元年。正月。王卽位。凡三日。爲開明王所弑。號中宗。壽二十五。

臥朝王

諱龍廷。大行第五子也。中宗母弟。興統三年。封開明王。篡中宗而自立。

丙午。元年。王卽位。尊號曰開天。應運聖文神武則天崇道大勝明光孝皇帝。王性好殺人。有臨刑用茅纏以火燒之。又使優人廖守心持鈍刃而解之。以遲其死。如此數日。其人哀號痛切。守心戲曰。汝不慣受死。王大笑。以爲樂。凡征討所獲虜俘。則押赴江岸。潮退。令人作水牢。驅入其中。潮漲。則呵呷而亡。又使登高木。從下伐之。王又幸支寧江。江多蛟。乃繫人於舟側。往來中流。令蛟害之。凡牲牢將供庖廚。先使人牽入。手刺殺之。然後付庖人。又削甘蔗於僧統郭卯頭上。陽爲失手。傷卯頭流血。王大笑。或蚤夜殺貓。賜諸王食。

食畢以猫頭示之。諸王皆嘔吐。每視朝則使優人喋喋其口。以亂執政之奏事。又以守宮爲膾。以與人相爭而食。諸王叛。王討平之。伐禦蠻王克之。改峯州爲太平府。尊母氏爲興國廣聖太后。

丁未二年。定文武官制。一遵於宋。

戊申三年。正月。改元景瑞元年。王親征都良、渭龍、二州。俘蠻人及馬數百匹。使人以杖擊蠻。因痛甚。蠻大呼。誤犯大行諱。王大笑。再命擊之。蠻人復呼。屢犯。王甚悅。又討愛州。俘其人。作囹圄其中而笑之。

己酉。景瑞二年。秋七月。王征驩、唐、何、石等州。冬十月辛亥。王薨於寢殿。號臥朝王。王有痔疾。臥以視朝。年二十二卽位。在位四年。年二十五。改元者一。

右黎自大行至臥朝。共三主。始庚辰。終己酉。凡三十年而亡。

越史略卷二

阮紀

太祖

諱蘊。姓阮氏。北江古法人也。母范氏。以太平五年二月十七日生。幼而聰睿。器宇恢豁。遊學於六祖寺。僧萬行見而異之。曰。此非常人也。強壯之後。必能濟世安民。爲天下主。及長。慷慨有大志。不事產業。好涉獵經史。應天中事。中宗及中宗爲臥朝所弑。羣臣皆奔亡。惟王獨抱尸而哭。臥朝嘉其忠。拜左衛衛殿前指揮使。王所居鄉中有木綿樹。爲雷所震。其迹成文。云樹根杳工。木表青青。禾刀木落。十八子成。震宮現日。兌宮隱星。六七日間。天下太平。萬行乃謂王曰。臣近見讖文之異。知黎當亡而阮當興也。阮氏無若公之寬慈仁恕。頗得衆心。臣年七十有餘。但不及見盛治爲恨耳。王恐語泄。使萬行匿於芭山。景瑞二年。臥朝薨。嗣主幼沖。王年三十六。將隨龍軍五百人入宿衛時。在內祇候。陶甘沐揣知王有欲受禪之意。遂以間微激之曰。主上冥頑。多行不義。天厭其德。弗克壽終。嗣子沖幼。未堪多難。庶事煩擾。百神靡依。下民嗷嗷。欲求其主。親衛盍因此時。遠追湯武之迹。近鑒楊黎所行。上順天心。下從人望。而猶守區區之小節耶。王雖內悅其言。而疑有奸謀。乃陽罵之曰。公何爲敢出是言。吾必執以送官。甘沐徐曰。臣見天時人事如此。故敢啓之。今欲送官。誠不辭死。王曰。吾安忍告公。但恐語泄而併誅耳。甘沐復謂王曰。國人皆謂阮當

代黎圖讖已見不可掩也。轉禍爲福。今其時矣。親衛尙何疑乎。王曰。吾觀公志。與萬行不異。誠如此言。計將安出。甘沐曰。方今百姓疲弊。民不堪命。親衛若撫以恩德。彼必翕然從之。猶水之就下。孰能禦之。甘沐知事急。恐變生。乃語朝中卿士。卽日皆會於朝堂。謀曰。今者億兆異心。上下離德。人怨先王之苛虐。不欲歸從嗣君。咸有推戴親衛之志。吾輩不因此時立親衛爲天子。倉卒有變。得保其首領耶。於是共扶王正殿。立爲天子。百官皆呼萬歲。

元年冬十一月王卽位。大赦天下。焚網羅獄具。羣臣上尊號曰。奉天至理應運自在聖明龍見睿文英武崇仁廣孝天下太平欽明光宅昭彰萬邦顯應符威威震蕃蠻睿謀神功聖治則天道政皇帝。追尊考曰顯慶王。母明德太后。册王后六。立長子瑪爲太子。餘皆侯爵。王女十三人皆公主。以長女安國公主嫁於陶甘沐。封爲義信侯。王兄某爲武威王。弟爲翊聖王。陳鎬爲相公。吳丁爲樞密使。歸碩輔爲太保。鄧文孝爲太傅。裴車磊爲左金吾。譚坦爲左武衛。杜間爲右武衛。初古法鄉應天寺犬生一白子。背上黑毛成

天子字。至是王以甲戌生。

庚戌二年正月。改元順天。元年初王以華閩城湫隘。乃遷都大羅城。初遷時泊舟城下。黃龍見於御舶。因號

昇龍。改華閩爲長安府。北江曰天德。古法曰天德府。昇龍京內起朝元殿。左置集賢殿。右置講武殿。左

啓飛龍門。右啓丹鳳門。正陽啓高殿。塔曰龍墀。墀內翼以迴廊。周匝四面。乾元殿後置龍安。龍瑞二殿。左

建日光殿。右建月明殿。後有翠華宮。城之四面啓四門。東曰祥符。西曰廣福。南曰大興。北曰曜德。又於城

丙 內起興天寺五鳳星樓。城隍方創勝嚴寺。

亥 順天二年。王親征愛州。莒隆賊平之。是歲又於城內起太清宮。萬歲寺。鎮福藏。城外建四天王寺。衣錦

寺。龍具聖壽寺。又起含光殿於瀘東步。占城國進獅子。

壬 順天三年。建龍德宮於城外。以居太子。欲其周知民事。

十二月。神人留迹於東南峯盤石上。長廣三尺。深一尺。真臘國來貢。王征濱州。

癸 順天四年。御含光殿。觀競渡。冬十月。王征渭龍州。蠻克之。

甲 順天五年。命翊聖王討蠻將杜長惠於金華步。克之。斬首萬計。俘獲士馬不可勝數。離州獻麒麟。

改應天府爲南京。真臘來貢。

丙 順天七年。大熟。禾三十結。直錢七十文。賜境內三年租。起天光、天德二寺。及塑四天帝像。地震。望

諸名山。度京師人千餘爲僧道。

丁 順天八年。乾元殿震。宋真宗封王爲南平王。

戊 順天九年。使阮清道如宋。求三藏經。得之。

庚 順天十一年。命王子討占城。克之。初乾元殿震。視朝於東殿。今又震。視朝於西殿。

辛 順天十二年。春二月。戊子。以王誕日爲天成節。築萬歲南山於廣福門外。多作飛禽走獸之狀。羅列其

上。

壬戌順天十三年命翊聖王作大光歷。

癸亥順天十四年改潮陽鎮爲永安州。

甲子順天十五年命太子伐峯輪州開國王伐都金州築昇龍城。

乙丑順天十六年僧萬行化身真臘來貢詔立番寨於驢州南界。

丙寅順天十七年命太子討濱州遣使如宋。

丁卯順天十八年命太子討七源州東征王討文州。

戊辰順天十九年春二月王不豫三月戊戌薨於龍安殿壽五十六廟號太祖葬天德府壽陵在位二十年。

改元者一。

太宗

諱德政名佛瑪太祖長子也母黎氏太祖卽位封開天大王又立爲太子順天十一年奉命平諸蠻賊有

功太祖薨羣臣奉遺詔詣龍德宮請卽位時翊聖武德諸王皆伏兵於廣福門外欲襲王王自祥符門入

至乾元殿三府兵攻益急王命阮仁義擊之三府兵敗武德王爲黎奉曉所殺是日王卽位於柩前大赦

改元以順天十九年爲天成元年上尊號曰開天統運尊道貴德聖文廣武崇仁上善政理民安神符龍

現體元御極億歲功高應真實歷通元至奧興隆大定聰明慈孝皇帝初王生於長安府府中民家牛

無數自換其角占者曰丑生人爲天子言訖不見至是王以丑年生開國王據長安府以叛王親征之

開國王降詔免其罪。五月，神人現迹於萬歲寺，以梁任文爲太師，吳尙丁爲太傅，陶處忠爲太保，阮道紀爲樞密，阮徹爲左參知政事，廖嘉真中書侍郎，矯蓬爲右參知政事，何遠爲諫議大夫，歸文雷爲左腹心，阮仁義爲右腹心，置殿前築軍十衛，一曰廣聖，二曰廣武，三曰御龍，四曰捧日，五曰澄海，每衛各分左右。六月，以王誕日爲天聖節，築萬歲山於龍墀，有五峯，中峯立長壽仙幀，左右皆有白鶴，山上爲飛仙鳥獸之狀，山腰又有神龍蟠繞，開植旌旗，懸金壁，使伶兒在窟中弄笛吹笙，歌舞爲樂。

己未 天成二年，以諒州牧申紹泰尙平陽公主，愛州但乃甲叛，王親討擒之。神人現迹於天勝寺。龍現於乾元殿基，王曰：「其殿已圯，惟基獨存，今龍現之意，其龍勝之地乎？」乃增廣其規模而重修之，改名曰天安殿。殿左起宣德殿，右起延福殿，前曰龍墀，東置文明殿，西置廣武殿，墀之左右對曰鐘樓，以登聞、冤獄之事，前安奉天殿，上建正陽樓爲掌漏刻之處，後起長春殿，上建龍閣，其外築城曰龍城。秋八月，驩州獻麒麟二。冬十月，萬歲寺前雨白米成堆。

庚午 天成三年，起天慶殿，後架鳳凰樓。冬十月，王幸烏路省，斂命大僚班黎偓佺使於宋。大熟。

辛未 天成四年，驩州叛，王討平之。造寺觀凡一百五十處。

壬申 天成五年，釋迦寺優曇樹開花。四月，王幸杜洞江，耕籍是田，獻九穗禾，詔改其田曰應天。

癸酉 天成六年，春，定源州叛，王討平之。九月，斄源州叛，王討之。

甲戌 天成七年，四月，改元通瑞元年，詔羣臣奏事於王前者，稱王曰朝廷。秋九月，幸仙遊山重先寺，詔起

重興殿。古州法雲寺僧上言。寺中放光數道。隨光掘之。得石函一。函內有銀函。銀函內有金函。金函內有琉璃瓶。瓶中有舍利。

乙亥。通瑞二年。天慶殿前生芝草。封王子日中爲承乾王。起造西市及長廊。建太和橋於蘇歷江。愛州叛。王親征。克之。王在愛州行宮宴羣臣。密指定勝將阮慶曰。此必反矣。左右問其故。曰。此人瞻視異常。勳止失節。見我有漸色。是故知之。其年果反。

丙子。通瑞三年。春。三月。以峯州牧黎順宗尙慶城公主。四月。置驩州行宮。都金、常新、平原等州叛。

丁丑。通瑞四年。以開皇王爲元帥。討都金等州。克之。烏路桑園中古佛湧。設競渡禮。大水。

戊寅。通瑞五年。幸布海口。耕籍田。秋。八月。王御含光殿。觀競渡。九月。神人現迹於天勝寺。宋仁宗封

王爲南平王。占城王子地婆刺等來朝。

己卯。通瑞六年。春。正月。廣源州首領儂存福叛。稱昭聖皇帝。封長子智聰爲南衙王。改其州曰長其國。王親討之。師渡冷浮津。白魚入王舟。至廣源州。存福焚其部落而遁。縱兵追之。獲存福。其子智高脫身而走。執存福歸京斬之。夏。五月。廣源州獻生金一塊。重一百十二兩。六月。改元爲乾符有道元年。冬。十二月。真臘國來貢。遣使於宋。

庚辰。乾符有道二年。春。正月。朔。日有食之。

辛巳。乾符有道三年。夏。五月。定宮女階品。六月。殿前指揮使丁祿馮律等謀叛。事覺伏誅。冬。十一月。以

明威侯知又安州。儂智高與其母阿儂、自雷火洞復據儂猶州。改其州曰大曆國。王命討之。生擒智高。王憐存福既被誅。因原其罪。畀以廣源、雷火、平婆、思浪等州。

壬午。乾符有道四年。春三月。王幸茄覽海口。耕籍田。地震。交州叛。冬十月。改元明道元年。詔中書省

刪定律書。十一月。詔諸路各置亭候。以便四方之觀認。凡老弱及有大功已上犯罪者。得贖銅。鑄

明道錢。梁茂材使於宋。

癸未。明道二年。夏四月。愛州叛。五月。以開皇王爲都統大元帥。討愛州。奉乾王爲都統元帥。討文州。文州

平。夏四月。王幸武寧州松山寺。見其頽殿中有石柱欹壓。上慨然有重修之意。石柱忽然復正。因命儒

臣作賦以紀其異。秋九月。使魏徵如廣源州。賜智高郡王印。仍拜太保。詔造艦數百艘。皆作龍、鳳、魚、

蛇、虎、鸚鵡之形。冬十月。長春殿御盾自動。

甲申。明道三年。二月。御盾復動。癸卯。親征占城。以開皇王爲留守。甲申。發自京師。乙巳。次大惡海口。時波

濤帖息。大軍利涉。自大安至姑山。紫雲捧日。至礪灣。有片雲覆王舟。隨其行止。至思明海口。白魚入舟。王

聞占城王先列象陣於五湖。江以待官軍。遂詔軍士捨舟登陸。王乃部分士卒。建旗鳴鼓。欲擊之。賊見兵

威甚盛。遂先潰。王追斬三首。郭嘉懿斬其王仁斗。以獻。獲象三十頭。生擒五千人。餘爲亂兵所殺者無數。

王爲惻然。下詔有殺占城人者。斬。秋七月。大軍入佛誓城。俘其宮女妻妾。八月。班師。至長安府。黃龍

見於王舟。九月。王至自占城。冬十月。改元天感聖武元年。大熟。十二月。置懷遠驛於嘉林。以館四方

客使 太保儂智高來朝。

乙酉 天感聖武二年春三月立大內碑。夏五月造太平車以黃金爲飾。

丙戌 天感聖武三年夏五月起銀漢宮於後苑以居占城宮人。

丁亥 天感聖武四年置望國鎮及歸德保康宣化清平永通感化安民七驛各立碑候以爲蠻夷歇宿之處。

占城來貢詔流其使於真登州以其王雍尼不恭故也。

戊子 天感聖武五年儂智高以勿惡洞叛命武威侯及太尉郭盛諡討之交戰之日天地晦冥俄而轟雷震

於洞中其酋長支體殲裂舉洞驚駭遂降三月立杜壇於長廣門外以爲四時祈穀之處秋九月開

瓊林勝景春光三園冬十二月詔定打春牛法范去了謀反事覺剮其肉於東西市

己丑 天感聖武六年春三月改元崇興大寶元年秋八月鑿御溝於鳳城外又開金鳴萬歲池初鑿池時中

鏗然有聲掘之得黃金一塊重五十兩因以名又築石山三峯於池上建舞鳳橋

庚寅 崇興大寶二年置決旱大發文湘洞於宋境西平州界

儂智高據宋界安德州勿陽洞以其洞爲南天國改元景瑞愛州五縣江龍池甲叛

辛卯 崇興大寶三年開瑞清沼應明池於勝景園置內外隨龍軍命左驍衛將軍陳稔將五縣人鑿个凜

港 崇興大寶四年智高請附於宋宋不納乃寇於宋五月智高攻破宋橫山寨遂陷邕州以其州爲大

王 崇興大寶四年智高請附於宋宋不納乃寇於宋五月智高攻破宋橫山寨遂陷邕州以其州爲大

南國自稱仁惠皇帝。

癸巳崇興大寶五年。宋伐智高。使梁珠來乞師。詔以殿前指揮使武珣爲招討使以援之。是月。宋狄青敗智高於歸仁。智高奔大但國。三月。鑄鐘置龍墀。令民之有冤抑不達者。聽撞其鐘以聞。宋石鑑從特磨道襲智高母阿儂。阿儂年已六十餘矣。大但人函智高首獻於宋。斬阿儂於都市。由是諸儂遂滅。
甲午。崇興大寶六年。九月。戊寅。王不豫。冬十月。辛卯。薨於長春殿。壽五十四。在位二十六年。○此下當有改元者六四字。
葬天德府壽陵。

聖宗

諱日尊。太宗第三子也。母梅氏。太宗夢月入后懷。以順天十四年二月二十五日生於龍德宮。天成年。立爲太子。及長。通經傳。曉音律。尤長於武略。太宗命征伐。所向皆克。太宗薨。奉遺詔卽位於柩前。十月。改元以崇興大寶六年爲龍瑞太平元年。尊母梅氏曰靈感太后。上尊號曰法天應運崇仁至德英文睿武慶感龍祥孝道聖神皇帝。詔焚網羅獄具。出翠華宮女。賜東宮文武臣僚爵各有差。以裴嘉祐爲文明殿大學士。范彝爲左威衛。陳改爲右威衛。劉慶爲左清道。王行爲右清道。改神衛匡聖都爲拱聖。廣德都爲忠武。廣武都爲昭武。及增置左右龍翼都各一百人。丙午。葬太宗。立后八人。以阮道成爲太師。郭肇日爲太尉。建永壽殿。
乙未。龍瑞太平二年。修大內諸殿。癸丑。以王生日爲乾興節。占城來貢。秋。八月。王御水晶殿。觀競渡。

冬十月大寒。王謂左右曰：我居深宮之中，御獸炭，襲狐裘，冷氣猶且如是，況囹圄之中，縲紲之苦，曲直未分，腹之不充，形之不蓋，一爲寒風所逼，豈不死於無辜？我甚憫之。其令有司發府庫，衾席賜之，仍日給二飯。賜境內今年稅錢之半。造東林寺及東究山靜慮寺。宋仁宗封王爲郡王，遣使於宋。

丙申龍瑞太平三年，設羅漢會於天安殿。秋八月，眞臘來貢，造崇慶報天寺，發府銅一萬二千斤，鑄鐘留於其寺。王爲親製銘文。冬十月己酉，下勸農詔，改大首領爲刺史。

丁酉龍瑞太平四年春三月，起大勝資天寶塔於崇慶報天寺，高數十丈，其制爲三十層。夏四月，王使員外郎梅元清以麒麟二遺於宋。申午，黃龍自瓊林園見於長春殿前。安州道叛。冬十月，王幸道大旁海口，黃龍見於金鳳舟，因改爲祥龍。十二月，起天福、天壽二寺，以黃金鑄梵王帝釋像以安置。占城來貢。

戊龍瑞太平五年，起壺天八角殿於金鳴池。三月，闢祥符門，起樓其上。夏五月，黃龍自龍德宮見於永壽殿。六月，起靈光殿，左立建禮殿，右立崇儀殿，殿前構獨柱六角蓮花鐘樓。秋九月，王幸波路海口，因幸塗巧築塔處。

己龍瑞太平六年春三月，王蒐於諒州南平江，因幸駙馬申景元第，造崇嚴報德寺於武寧州。夏六月，黃龍見於永壽殿。癸未，改元以龍瑞太平六年爲彰聖嘉慶元年。秋八月丁丑，御水晶殿，視賜羣臣戴幘頭著靴自此始。丙戌，黃龍見於長春殿，賜塗山塔號曰祥龍塔。選京師諸色人男爲黃男，造

延興土恆門 占城來貢。

庚子 彰聖嘉慶二年 禁御船火 拱聖火 隨龍火 及內庖人出入御堦 不得與在內小祇候相語 及通信物往來 違者死罪 遇赦不原 二月壬申 王幸西源州 捕象 獲白象三 夏六月 諒州牧申紹泰以兵入宋界 西平州如磬縣 捕本州逃亡人 虜其指使楊侶才及男女牛馬 不可勝數 宋遣吏部侍郎余靖赴邕州 議其事 王命裴嘉祐等赴邕 會議 靖厚賂嘉祐 及附書乞還侶才 王不省 秋八月 王幸交海口 黃龍見於延春船 因改交海曰天符海口 王親纘占城樂曲及節鼓音 使樂工歌之 冬十月 造行宮於窰潭 以觀魚 占城來貢 渭龍州獻白象。

辛丑 彰聖嘉慶三年 羅順州獻白象 沙蕩洞叛 王親征 克之 愛州五縣江叛 祈嗣於芭山 黃龍見於壇內。

壬寅 彰聖嘉慶四年 嘉林郡進六眸三足龜 秋九月 使人採金於武健洞 採銀於下連縣。

癸卯 彰聖嘉慶五年 夏六月 起洞仙宮於大內之東 獻白龜 王命起寺於芭山 以爲祈嗣之處 獲其珠以獻 冬十二月 起銀河門 朝賀日 指使唱聖躬萬福 軍士應聲唱喏 占城來貢。

甲辰 彰聖嘉慶六年 春二月 日有重光 夏五月 造布海口行宮 冬十月 麻沙洞叛 王討克之 黃龍見於清瀾船 宋英宗加王同平章事。

乙巳 彰聖嘉慶七年 春二月 觀魚於扶龍潭 丙午 幸布海行宮 耕籍田 夏六月 王御天慶殿聽訟 時王

女洞仙公主侍側。王顧公主謂獄吏曰：吾之愛吾子，亦猶天下父母之愛其子也。百姓無知，自冒典憲，吾甚憫焉。應自今罪無輕重，一從寬宥。秋七月，忙貫州叛，王討降之。八月，開上林園。丙辰，黃龍自大明殿見於會元殿。又見於布海行宮。癸未，幸究瀾行宮，號其宮曰景興。窰潭行宮曰翫春宮。冬十二月，黃龍見於曜靈殿。又見於遊蟾閣。猗蘭元妃所居。占城來貢白犀一。

丙午，彰聖嘉慶八年春二月，改元爲龍彰天嗣元年。三月，黃龍見於太子宮中。甲申，都曹陶池獻白雀。

九月，蠲檳榔稅。甲子，王使郎將郭滿築塔於仙遊山。冬十一月，幸啓瑞行宮省歛。平陽公主男

申道元尙天成公主。

丁未，龍彰天嗣二年，以員外郎魏仲和、鄧世資爲都護士師，書家十人爲按獄吏，賜仲和世資每月俸錢各五十貫，禾各二百結，并鹽魚等。書家各二十貫，禾一百結，以止其受賂之心。夏六月，辛亥，黃龍見於位仁行宮。辛卯，王幸位仁省歛及觀競渡。

戊申，天貺寶象元年春正月，眞登州獻白象二，几郎州獻白象一。黃龍見於曜靈殿。二月，都臘縣獻白

象及白雀。黃龍見於啓瑞行宮。夏五月，又見於會仙殿。修戰艦。秋八月，龍舟無故自動，離本處三尺。九月，黃龍見於永春、清瀾二船。宋神宗封王爲南平王，加開府儀同三司。遣使如宋。

己酉，神武元年春二月，戊戌，詔親征占城國。丁未，盟於龍湄。庚寅，發駕。丁巳，至安州。黃龍見於金鳳舟。

庚申，次南界海口。黃龍又見於金鳳舟。乙丑，使大僚班黃撻等攻日麗海口，克之。己巳，度大長沙。庚

午次思容海口。三月癸酉夜，龍見於景勝船。丙午次尸喇皮柰海口，有二鳥並飛，隨王舟，如導從之狀。大軍前進，次須毛江岸，見其將布皮陀囉等陣於江岸，官軍縱擊，斬布皮陀囉，占城死者不勝數。其主第矩聞軍敗，乃攜妻子夜遁。是夜引軍，傅佛誓城，至同羅津，佛誓人降。夏四月，元帥阮常傑俘獲第矩於真臘界。夏五月，王宴羣臣於占城王殿，又親舞盾擊毬於其塔。王命徧數佛誓城內外人家，凡二千五百六十餘區，並焚之。是月班師。癸巳次思明海口，是夜黃龍見於御船。六月己巳渡海，黃龍見於金鳳舟。戊申渡布政海口，大小磊磊山，龍舟觸石而破。辛酉王至自占城，次朝東津，詔有司肅軍容，盛陳儀衛，上御寶車，羣臣皆騎馬導引，占城王第矩戴麻骨冠，著白氎衣，以絹繫腰，令與武都五人牽之，繫其黨屬以從。秋七月，奏捷於太廟。丙辰黃龍見於寶車。冬十一月丁丑，赤羽夾日。真臘來貢。庚戌神武二年夏三月，造紫神殿。五月黃龍見於長春宮龍光殿。秋七月乙卯，黃龍見於位仁宮。九月造東南二天王寺。

辛亥神武三年春正月，御書佛字，長丈有六。自春至夏不雨。定贖杖刑銅數。冬十二月，王不豫，詔有司誤入官職都左右廂者杖八十。

壬子神武四年春正月，庚寅王疾亟，薨於會仙殿，壽五十。廟號聖宗，在位十九年。改元者五。葬天德府壽陵。

仁宗

諱乾德，聖宗長子也。母猗蘭元妃黎氏，以龍彰天嗣元年正月生王於洞仙宮，卽日立爲太子。王爲人日

角龍顏。手垂過膝。尤通音律。凡樂工所習歌曲。皆王所親製。以神武四年春正月。卽位於柩前。尊母猶蘭元妃爲太妃。上尊號曰憲天體道聖文神武崇仁懿義純誠明孝皇帝。以上陽太后同聽政。夏四月。八日。行浴佛禮。王御天安殿視朝。是日以大僚阮常傑爲檢校太尉。阮日成爲兵部侍郎。以下各有差。赦都護府囚。諒州牧楊景通獻白鹿。羣臣上表稱賀。拜楊景通爲太保。眞腦來貢。秋七月。黃龍見於永壽殿。葬聖宗。羣臣上中元節賀表。王幸窰潭行宮。蜀占城白氎賦。迎法雲佛赴京師祈晴。祀傘圓山。閣使魏徵以年老致仕。詔賜几杖。詔遴選諸僧有投獻詩及僧官之職文字者。隸爲書家。以補其職之缺。徙捧日坊於南市。王御天安殿。羣臣上賀立表。造長廣門。太平門。上水河門。迎秋祠。歸仁驛。凡五處。以王生日爲壽天節。立后二人。

癸丑二年正月。改元曰太寧元年。尊太妃爲太后。靈仁太后姓嫉妬。以嫡母而不得預政。因謂王曰。老母劬勞。以有今日。及富貴而他人是居。將寘老母於何地乎。王雖冲幼。頗知葬上陽太后子。乃幽上陽太后及其侍女七十二人於上陽宮。逼令殉聖宗葬。占城國來貢。秋七月。黃龍見於遊蟾閣。八月。峯州獻白鹿。宋神宗封主爲郡王。

甲寅太寧二年。拱聖都火頭江曳家火。延燒大興門。夏四月。重修大興門。黃龍見。白雀效質於禁庭。

秋九月。黃龍見。宋王安石秉政。有獻言者。謂我國已爲占城所破。餘衆不滿萬人。可計日以取。於是沈起、劉彝、知桂州起彝。乃集溪洞土丁爲保甲。又於海濱造舟艦。教水戰。禁州縣不與我邊貿易。王知之。

乃先發諸道兵十萬人分爲二道使阮常傑領水軍出永安攻欽廉宗竄領陸軍出永平攻邕州我師所向無前常傑攻陷欽廉二州復與宗竄會圍邕宋廣西監張守節率兵救之至崑崙關常傑迎戰大破之斬守節知州蘇緘以城固守我爲飛梯以臨城彼施以火炬飛梯不能近又以毒矢射之城上人馬死者相枕彼以神臂弓發我之象軍多有殪者城高而堅攻之四十餘日不能下獲宋人教以土囊傅城而登常傑從之城遂陷蘇緘奔還州廨先殺其家屬三十六人後乃縱火自焚軍士求緘不得乃盡殺吏民五萬餘人是役也所殺獲邕欽廉三州人無慮十萬

卯乙太寧三年春正月奏捷占城來貢

丙辰太寧四年春三月王觀扞水城黃龍見於王舟青龜負圖以見秋七月宋以廣南宣撫使郭逵趙

高爲招討使總九將軍來伐我國王命阮常傑領水軍拒之昭文宏眞二侯皆溺死如月江兩軍相持月餘常傑知宋軍力困夜渡江襲擊大破之宋兵死者什五六遂退取廣源州冬十月改元爲英武昭勝

元年十二月以內給事黎文盛爲兵部侍郎

丁巳英武昭勝二年夏五月設仁王會於天安殿秋九月築隄於如月江長六萬七千三百八十步冬

十月幸符仁省斂遂幸龍水海口龍見於王舟占城來貢

戊午英武昭勝三年閏正月修大羅城二月朔詔罷秋筵宴禮使員外郎陶宗元領馴象五遣於宋請

還廣源蘇茂等州宋人徵還所掠三州民兵大水入城內

己英武昭勝四年。諒州獻白象。雨雹。五月大熟。天成公主獻六眸三足龜。冬十月黃龍自常春園見於其宮。

庚申英武昭勝五年。春三月王幸窮江觀魚。夏四月己亥神龜負圖。五月唐人林瓊獻紫芝。秋八月廿

露降。王御靈光殿觀競渡。閏月設秋筵宴禮。王幸符仁省歛。

辛酉英武昭勝六年。冬十一月日有重光。占城來貢。王還三州人丁於宋。宋亦以廣源等州還於我。

使員外郎梁用律如宋請大藏經。

壬戌英武昭勝七年。春二月降欽聖公主於渭龍州牧何彝慶。冬十二月祇候宏阮波斯謀反。伏誅。占

城來貢。

癸亥英武昭勝八年。春二月王御天慶殿。閱定京城黃男爲三等。三月選美女爲萬延宮女。夏五月黃龍

飛自紫宸殿見於會仙殿。五月造洞仁宮。六月御車火。秋九月麻沙洞叛。冬十月親討克之。

觀競渡。占城來貢。

甲子英武昭勝九年。夏六月使兵部郎中黎文盛如永平寨議疆界事。宋以文盛爲龍圖閣待制。冬十一

月詔國中造瓦屋。占城來貢。

乙丑英武昭勝十年。春二月丁亥改元廣祐元年。秋八月以黎文盛爲太師。占城來貢。

丙寅廣祐二年。春正月阮遠獻六眸龜胸有圖書。二月真臘來貢。有婆羅二人。冬十一月起大覽山寺。

丁卯廣祐三年夏五月起造秘書閣。冬十月幸覽山夜宴羣臣於山上王製覽山夜宴詩二首留題。宋哲宗加王同平章事。占城來貢。

戊辰廣祐四年秋九月戊申置十大書家。冬十月築覽山塔。十二月景靈宮成。占城來貢。

己巳廣祐五年二月造冷淫徑。宋兵入石犀州。占城來貢。

庚午廣祐六年春二月合歡宮成。宋哲宗封王爲南平王遣使如宋。

辛未廣祐七年春二月王幸諒州觀捕象。見官黎全義獻五色龜黎文盛獻白象一。占城來貢。競渡。

壬申廣祐八年夏五月造啓瑞行宮。大熟。十二月改元會豐元年。

癸酉會豐二年冬十月朔日有食之。優曇樹開花。

甲戌會豐三年秋九月覽山寺成賜名景隆同慶寺王書篆額。占城來貢。遣員外郎阮利用如宋。

乙亥會豐四年夏五月詔諸侯子入朝。六月聖極后薨。真臘占城來貢。

丙子會豐五年冬十一月王觀魚於窰潭時王御小舟侍衛甚少木師黎文盛久蓄姦謀因以幻術起大煙霧潭中晝冥俄而王聞櫓聲稍近意其有變以戈搃之煙霧隨戈而斂見文盛舟已迫果石簏具使人擒之詔流文盛於梁江頭初文盛家有大理奴善爲幻術文盛師事之至是乃反。

丁丑會豐六年秋八月白日星見。赦都護府囚人。冬十一月禁百姓造瓦屋大舟。占城來貢。競渡。

戊寅會豐七年秋八月地震。彗見。起陸地鰲山。設競渡禮。九月造崇淵殿於芳蓮池。左置暉陽殿。來鳳亭。右立映蟾殿。遏雲亭。前起長鳴樓。後跨玩花橋。遣員外郎阮文信如宋。乞三藏經。占城來貢。

己卯會豐八年。捧日都獻六辟龜。秋九月起安老山寺。冬十月禁京城婦女不得效宮妝。占城來貢。

庚辰會豐九年夏四月造僊遊山永福寺。秋七月以矯文思爲上林國士師。十二月大疫。

辛巳龍符元化元年春正月改元。二月王觀魚於窮江。遂幸應豐省耕。夏六月王幸符仁省種。秋七月賜百官秋衣。設宴禮。造開元觀。九月王觀魚於窮江。黃龍見於翔龍舸。冬十一月慶雲見。王御象柵觀捕象。黃龍見。十二月改驩州爲乂安府。造起延祐寺。

壬午龍符元化二年春二月王幸應豐行宮省耕。冬十二月立春。瑞雪降。造開元。太陽。北帝。三觀。造瑞雲車。大水。占城來貢。遣員外杜英厚使於宋。

癸未龍符元化三年春正月詔京城內外皆築堤捍水。二月太后發府錢贖諸貧家女之典命者。嫁與饌夫。秋八月置龍翔都。冬十月玄鹿來。競渡。

甲申龍符元化四年春三月閱左右興男勇捷兵爲王塔都御龍兵。爲興聖廣武都百姓之大族者。爲武勝兵。改田兒爲鐵林兵。秋九月朔延成侯以笏擊忠義侯於天安殿。占城來貢。競渡。

乙酉龍符元化五年春正月菖蒲生花。二月祠高祿。夏六月太尉阮常傑卒。秋九月築延祐寺白瓷。

永隆二腹舶及造戰船。員外郎魏文相使於宋。占城來貢。天成公主進白象二。

丁亥龍符元化七年夏六月王幸章山黃龍見。冬十一月地震。十二月造都護府。

戊子龍符元化八年春正月築章山塔。築隄於機舍港。昭聖后薨。占城來貢。

己丑龍符元化九年夏四月王聽逆黨蘇厚杞崇訟厚崇皆上木馬。冬十二月造洞靈臺。

庚寅會祥大慶元年春正月設廣昭燈會於大興門外。三月婦人黃氏獻鳳雛。毛羽具五色。九苞。是月參

政徐文通獻白虎。白馬生距。檳榔一本生十二株。獻白雀。秋八月占城國獻異象。所居有神光見。

遣員外郎陶彥使宋。

辛卯會祥大慶二年夏四月清化府獻檳榔一本生九株。獻白龜。白雀至禁庭。日重輪。大熟。留

守張延福獻白雀。冬十一月日重輪。占城來貢。

壬辰會祥大慶三年春正月甘露降。二月清化人言海邊有異兒。年方三歲。解言語。自稱皇帝的子。號曰

覺皇。凡王所動止。無不先知。王命中使往問之。所言皆驗。乃迎以歸。居於報天寺。王以其靈異。愛之愈隆。

時王無嗣。欲立爲太子。羣臣不可。乃止。遂設齋會於禁中。欲令覺皇投入爲己子。有佛跡山僧徐路道行

者。聞之而不悅。乃使其姊徐氏赴會。密以數珠結印授之。曰。至會所。則插在簷端。勿令人知見。徐氏如其

言。覺皇忽嬰熱病。遂語人曰。所見徧滿國界。皆有鐵網羅罩。無路得入。託宮中。王命大索。乃獲徐氏所藏。

數珠。遂收路繫於興聖廊。欲寘於辟。崇賢侯入朝。路哀叫曰。願賢侯拯救貧僧。僧幸得脫。則入爲侯子。以報其德。侯許諾。入見王。百般營救。謂覺皇實有神力。而爲路所咀解。是路勝於覺皇明矣。臣謂莫若賜路之託生也。王原之。覺皇疾亟。囑曰。我死後。宜造浮屠於僊遊山而葬之。夏四月。獻芝草。優曇花。及白鷄。

秋。九月。黃龍見於永光殿。冬。十月。黑龍見於宮中。

癸巳。會祥大慶四年。秋。八月。黃龍見於大明殿。獻白鹿。

甲午。會祥大慶五年。春。正月。瑞雪降。三月。黃龍見於章山塔。繞三匝。獻白雀六。冬。十月。以內常侍

黎伯玉爲大理寺造勝嚴寺。置善法堂。四面建千佛樓。安千佛寶相。競渡。員外郎陶信厚齋象頭

使於宋。

乙未。會祥大慶六年。春。二月。進茄花。結三果。三月。超類鄉崇福寺成。夏。六月。日重輪。秋。七月。獻金龜。

丙申。會祥大慶七年。春。正月。設廣照燈於大興門外。製木僧繫鐘。夏。四月。獻檳榔珠。六月。僧道行化身。

神宗生。冬。十一月。獻三足六眸龜。占城來貢。競渡。

丁酉。會祥大慶八年。春。正月。獻白鹿。玄鹿。三月。上幸章山。黃龍見。夏。四月。獻三足六眸龜。胸有善帝二

字。司農州獻赤馬。生距。黃龍見於洞靈祈壽寶臺。秋。七月。猗蘭太后薨。諡曰符聖靈仁太后。八月。

葬靈仁太后。火葬太后。是夜龍見。冬。十一月。立崇賢侯子陽煥爲太子。

戊戌。會祥大慶九年。春。二月。眞臘。占城。來貢。冬。十一月。甘露降。禁家奴不得身上刺龍。員外郎阮伯

己亥會祥大慶十年冬十月盟國人於龍墀。下詔伐麻沙洞。軍出之日黃龍隨舶而行。成慶侯獻六眸龜胸有玉字。王擊麻沙洞破之。宋徽宗加王守司空。

庚子天符睿武元年春正月改元。夏六月獻白雀。秋九月黃龍見。冬十月構衆仙臺。占城真臘來貢。競渡。

辛丑天符睿武二年夏五月大水至大興門。秋七月造僊遊山廣教寺。競渡。

壬寅天符睿武三年春二月隊山崇善延齡寶塔成。秋八月觀競渡。新製銀纓引於鹵簿。員外郎丁慶安使宋。

癸卯天符睿武四年春正月誕聖節。新製推輪舞亭。秋八月設秋筵宴禮。冬十月幸應豐行宮。造飛橋。過波刺江。築通霄臺。真臘來貢。大熟。

甲辰天符睿武五年冬十月築鬱羅臺。大旱。禱之乃雨。

乙巳天符睿武六年夏四月瑞聖公主獻六眸龜胸有國土安寧四字。六月王幸應豐。黃龍見於行宮。冬十一月黃龍見於洞靈宮。以內常侍牟都俞爲中相。

丙午天符睿武七年春正月禁春不得伐木。二月王御天安殿。觀諸王侯蹴毬於龍墀。夏五月黃龍見於永光殿。秋八月神龜見。中有道定王閣延寧公主八字。冬十一月使令書家嚴常、徐延等使於宋。

至桂州。見其經略司。謂常延曰。今年京東湖南等處。並已調發兵馬。拒大金國。未審歸期在何日。此間鋪馬斷絕。在在更少。請使領還禮物。大金元帥等。以是歲執宋徽欽二帝北歸。宋國大亂。
丁未。天符慶壽元年。冬十二月。王薨於永光殿。壽六十二。在位五十六年。廟號仁宗。改元者八。葬天德府。

越史略卷三

神宗

諱陽煥。聖宗之孫。崇賢侯子也。母杜氏。生三歲。仁宗養於宮中。立爲太子。以天符慶壽元年十二月卽位。於柩前。殯仁宗於壺天殿。癸未。成服。乙酉。王御天安殿視朝。卽日除服。因幸那岸觀宮。女上火壇。殉仁宗葬。

戊申。大順元年。辛卯。詔以國哀禁國中不得騎馬。庚子。王初御經筵。以武衛黎伯玉爲太尉。內人火頭。劉波楊珥爲太傅。中丞牟都俞爲諫議大夫。癸卯。使贄書於宋。訃仁宗之喪。及告以王初卽位時。宋高宗避金人已渡江。都臨安矣。眞臘寇乂安州。乙丑。上尊號曰順天廣運欽明仁孝皇帝。庚午。王御天安殿。盟國人於龍墀。六月。以王生日爲瑞天節。立后三。尊義母宸妃爲太后。二月。眞臘寇乂安。命太傅阮平公討之。擒其將而還。

己酉。大順二年。春。正月。設慶成八萬四千寶塔會於天符閣。甲午。尊父崇賢侯爲太上王。母杜氏爲太后。居洞仁宮。秋。七月。仁宗靈位燈生兩燄。青竹蛇蟠於寶辰。

庚戌。大順三年。夏。五月。獻白雀。太上王薨。諡恭王。六月。旱。禱而雨。占城來貢。競渡。遣使於宋。辛亥。大順四年。春。三月。詔家奴不得娶百姓女。宋高宗封王爲郡王。

壬子大順五年春三月黃龍見於麗光宮。秋八月真臘占城寇又安州詔太尉楊英珥討克之。阮承恩使於宋。

癸丑天彰寶嗣元年春正月改元。二月大明殿延命燈發花寶幡舞。馬生距。夏六月黃龍見於永光殿。冬十月造延生五岳觀。

甲寅天彰寶嗣二年春二月真臘占城來貢。自春至夏不雨。冬十二月古法堂枯樹生花。

乙卯天彰寶嗣三年春正月古銅鐘見。神龜見胸有一天永聖四字。

丙辰天彰寶嗣四年春二月又安州地震江水如血。九月詔京城內外三家爲一保。真臘將蘇破稜寇又安州命太傅阮公平擊敗之。

丁巳天彰寶嗣五年夏五月內人午炎獻生金一塊重六十六兩。秋九月王不豫薨於永光殿壽二十一。在位十年廟號神宗改元者二葬天德府。

英宗

諱天祚神宗第二子也。母感聖夫人姓黎氏。王爲人隆準龍顏仁慈寬恕年方三歲卽位於柩前上尊號曰體天順道睿文神武純仁顯義徽謀聖智御民育物羣靈丕應大明至孝皇帝改元以天彰寶嗣五年秋九月爲紹明元年尊號感聖夫人爲太后。黃龍飛入城。冬十月己酉黃龍夜自太清宮飛入禁內。

戊紹明二年夏四月以王生日爲壽寧節 宋高宗封王爲郡王 立后一

己紹明三年翁申利自稱仁宗之子據上源州以叛僭號平皇有衆千餘人二月詔諫議大夫劉禹偁擊

之爲利所敗利出據西儂州攻破富良府欲向京師命太尉杜英武討之至曠驛與利相遇大戰利軍大

敗死者不可勝數利奔隆令州十月英武攻隆令州破之俘二千餘人利奔諒州爲太傅蘇靈成所擒送

京師斬之

庚大定元年正月改元 二月獻白蟾蜍 冬十二月詔諸典賣熟田二十年内聽贖之凡相爭田地五

十年外不得申訟諸賣田地已有契不得贖 自春至夏不雨王禱之乃雨

辛大定二年秋八月丙寅黃龍夜見於永壽殿後橙樹

壬大定三年春二月富良州首領楊嗣明尙韶容公主 三月馬四足生距 夏五月太尉杜英武獻白

龜牟都俞獻白雀以都俞爲太師

癸大定四年夏四月獻六眸龜胸有以行法公四字 秋八月宋妖人譚友諒入思琅州自號呂先生率

衆寇廣源州 構廣慈宮太后居之 夏淫雨禱之有驗 黃龍見於永壽殿

甲大定五年夏四月彗見 秋七月造天資庫六所

乙大定六年秋八月象放光羣臣上表稱賀 九月獻白鴉 太后薨諡昭孝 書家阮昭獻白鴉

丙大定七年春二月幸蓓仁耕籍田

丁卯 大定八年夏四月王御龍墀觀捕象

戊辰 大定九年春二月獻赤馬生距 秋九月真臘寇又安州 王聽太尉杜英武獄徒英武爲昇田宏初

主冲幼政無小大皆委英武而英武又私於太后因益驕恣居朝廷則攘臂厲聲命官吏則頤指氣使衆

皆側目而不敢言駙馬楊嗣明等與殿前指揮使武帶率軍士詣越城門外大呼曰英武出入掖庭恣行

凶穢聲聞於外臣等請除之毋貽後患因收英武繫於具聖廊太后令人送酒食而密置金以賂帶等時

具聖都火頭阮揚言於衆曰汝等欲貪其賂我與汝必不免於英武之手不如殺之以紓吾禍執戈欲刺

之左具聲譚乃奪其戈止之曰殿前謂我英武罪雖死必當先稟上命揚怒詬之曰殿前是武吉非武帶

也何其貪人之賂而不顧公議耶言訖赴井而死英武既得罪太后憂悶思所以復英武職任者英武累

蒙赦宥復爲太尉輔政如之而寵任益隆由是得擅禍福之柄常欲思報前怨乃私以百餘人爲奉衛都

凡有罪者悉委本衛都捕之英武密言於王曰往者武帶等擅以兵入禁庭其罪莫大請除之王可其奏

英武遂命奉衛都捕帶等下吏治之獄成詔降智明王爲侯內侍杜乙等五人上木馬玉塔火頭八人等

斬於西市殿前指揮使武帶等二十人梟於江頭駙馬楊嗣明等三十人流惡水餘並徒爲田宏犒甲果

如阮揚所言是歲禁闈寺不得擅入宮中朝士不得往來王侯家諸犯入奉衛都地分者杖八十入廊內

者死罪 中書火阮伯獻赤麒麟 夏旱禱而雨

己巳 大定十年夏五月檳榔一本生二十八株 秋八月王幸廣慈宮觀競渡

庚午 大定十一年春二月獻六辟龜胸有籀文王以八萬四字夏四月朔地震五月天雨黃沙冬十月殿試占城雍明疊來朝請王封命王遣阮蒙以兵五千如占城雍明疊爲占城王

辛未 大定十二年

壬申 大定十三年春正月撞龍山獠叛大黃山獠儂可來叛王親征之九月築園丘壇於城南門以爲

郊天之處占城制皮囉筆來貢

癸酉 大定十四年秋八月競渡大水地震冬十月歲星犯太白十一月占臘來貢十二月地震

甲戌 大定十五年春三月天雨黃沙冬十二月御庫火米價騰踊造御天宮延富閣賞花亭

乙亥 大定十六年宋高宗封王爲南平王至是又遣外郎阮國以費送禮物宋高宗賜王衣帶鞍馬

丙子 大定十七年秋杜英武獻白孔雀冬十月起國威行宮及孔子祠十一月起長廊自千秋門至客

樓宋高宗加王檢校太師

丁丑 大定十八年夏六月乙未日月相鬪詔新定律令若干條諸殿前使及官職都火頭不得服私家役

違者杖八十諸色人著青衫者杖八十徒爲犒甲諸權勢家不得擅受百姓色人等諸王侯夜間不得

來往城內諸王侯家奴不得刺龍形於胸秩王幸清海行宮大魚出東步其形如牛

戊寅 大定十九年夏五月左司阮國以使宋回言臣到宋國見庭中有銅甌以受四方之章疏臣請陛下做

其制以達天下之情王然之爲置案於朝廷下令曰有欲言事者裁書投之旬月之間書疏填滿有暗投

無名書一道曰。太尉杜英武欲起兵入宮作亂。得書者以告英武。英武曰。公爲予奏按之。久不得其人。英武誣奏曰。此必立案之人爲之。王以爲然。命收國以及其弟儀。下吏治之。誣服。乃流國以於歸化寨。未幾。王欲召國以英武使人以酖送國。以曰。服此藥。可以辟瘴氣。國以知不免。服藥而死。冬十月。造眞教寺。詔以府金塗梵王帝釋像。置天符。天祐。二寺。

己卯。大定二十年。詔內明字及大僚班稱呼。太傅郎將上制崇班。供奉侍禁殿直稱呼。太保。無官者稱呼。管甲。祇候火頭稱呼。奉御。掃宏呼主都。天符。天祐寺柱流血。

庚辰。大定二十一年。起二女及蚩尤祠於布蓋坊。占城來貢。

辛巳。大定二十二年。秋七月。起古州法雲寺。太后薨。諡靈照。平隆場叛。命少師費公信攻破之。

壬午。大定二十三年。詔六十以上爲老劣。十七至十九爲第二等。十六以下爲黃男。詔自割勢者杖八十。

刺左膊二十三字還本色。仲夏地震。秋。造衆仙臺上層。蓋以金瓦。下層。蓋以銀瓦。

癸未。政隆寶應元年。正月。改元。禁天下不得服用假珍珠。五月。宋孝宗卽位。使費禮物。國書至欽州。王遣使迎之。

甲申。政隆寶應二年。春三月。重修天安殿。

乙酉。政隆寶應三年。春。築廣照延命燈臺。芒貫江弄洛蠻叛。命蘇憲成討破之。

秋。試學生。詔徙朝東門大羅城。邛七十五尺。築以磚石。以避江

水衝。占城來貢。

丙戌政隆寶應四年春三月幸景靈宮觀浴道浴道禮自此始六眸玉字綠文龜見又獻六眸紅龜項有赤文腹下具五色尾端有距獻白黑孔雀冬大僚阮恩獻六眸龜胸有天子萬世萬萬世七字獻白鴉

丁亥政隆寶應五年重修大興門天極公主歸於諒州牧懷忠侯

戊子政隆寶應六年獻優曇花

己丑政隆寶應七年

庚寅政隆寶應八年季夏迎蟾宮火占城來貢

辛卯政隆寶應九年罷浴道禮永光殿無故自動孟夏詔修文宣王廟及后土祠造太白閣秋七月地震

壬辰

政隆寶應十年冬造貞靈夫人祠於西陽橋外

癸巳政隆寶應十一年重修太和橋宋致書買象以備南郊鹵簿命大僚班尹子充費象十頭如宋

甲午天威至寶元年正月改元宋以我越爲安南國王爲國王立國號自此始降太子龍昶爲保國王

立龍幹爲太子龍昶性好色宮中有寵幸者皆私通焉王頗惡其無禮元妃徐氏有寵后乃使昶密傳私情以惑之欲徐氏自此見疏徐氏具以其狀白王因怒廢之一日王出視朝乳母抱高宗從之高宗啼不止王脫冠冠之乃止王奇之曰成吾業者必此兒十一月立爲太子降昶爲王

乙未天感至寶二年秋七月王不豫后請復立保國王王曰爲人子而不敬其親爲人君而能愛其民乎甲辰疾大漸謂太子曰國家山奇水秀人傑地靈珠玉寶貝靡不生焉他國莫比也宜慎守之乙巳王薨於瑞光殿壽四十一廟號英宗在位三十九年改元者三葬天德府

高宗

諱龍幹英宗第六子也母瑞珠后姓杜氏王方二歲以天感至寶二年七月卽位於柩前尊母瑞珠后曰照天至理太皇上尊號曰應乾御極宏文憲武靈瑞照符彰道至仁愛民理物睿神智化感政醇敷惠示慈綏猷建美功全業盛龍見神居聖明光孝皇帝王方冲幼政無巨細悉委太傅蘇憲成太后有廢立意伺憲成之出使以金帛賂其室呂氏使語憲成憲成曰吾身居相位受先王顧託以輔幼主今受人之賂而謀廢立天下其謂我何縱使衆人皆塗其耳目而無知者則將何辭以對先王於地下乎太后知其謀之不濟然意終不改乃召憲成謂之曰公於國家可謂忠矣然公之齒亦已向暮而事冲幼之君公之所爲其誰知之不如立長君則彼將德公之賜而長保富貴豈不蹙歟憲成曰不義而富且貴非忠臣義士所樂爲況先王遺囑言猶在耳其如公議何臣不敢奉詔遂趨而出太后乃遣促召保國王保國且驚且喜遂以小舟由蘇歷江而入憲成乃召左右官職都諭之曰先王以吾與爾曹戮力王室無貳厥心故以幼主付託今保國王以太后命謂廢主上而自立汝等宜盡其忠竭其力以聽吾約束用吾命者賞延於世違吾命者顯戮於市汝其勉之官職都皆翕然聽命頃之保國王至銀河門太后召益急保國欲入

官職都止之曰。未聽詔旨。不敢奉命。王苟自彊入。其犯之者。非我也。兵也。保國聞之。漸懼而退。季秋。以

太后弟杜安順爲關內憲國侯。以憲成爲太尉。太覽山神光見。孟冬。盟國人於龍墀。

丙申。貞符元年。宋孝宗賜王安南國王之印。太尉蘇憲成獻白雀。殿前指揮使黃炎獻白鹿。

丁酉。貞符二年。占城人入。又安州東界。獻六眸龜。項有朱文。上源州首領楊倚叛。

戊戌。貞符三年。仲夏。以生日爲乾興節。

己亥。貞符四年。孟春。地震。仲夏。增修真教寺。詔以其寺爲英宗忌辰行香所。六月。甲辰。兩日並見。己

酉。太尉蘇憲成卒。輟朝七日。清膳三日。初。憲成寢疾。惟參知政事武贊唐夙夜侍側。諫議大夫陳忠佐以

事務煩劇。不暇存省。及疾篤。太后問疾曰。如有不諱。其誰代之。憲成曰。平日所知。惟忠佐而已。太后曰。贊

唐日侍湯藥。而公言不及何也。對曰。陛下問其可否。故臣言及忠佐。如問其侍養。非贊唐而誰。太后雖嘉

其忠。竟不用其言。乃以杜安順聽政。禁魚鹽鐵器。不得至源頭博易。王與太后觀僧官子弟試誦般若。若

經。又御鳳鳴殿。試黃男辦寫古人詩及運算。孟冬。又御崇章殿。試三教子弟辦寫古詩及賦詩經義。運

算等科。戊戌。獻三足六眸龜。

庚子。貞符五年。詔三教修大內碑文。定王侯入朝例。夏。以令書家阮午爲副行遣。孟秋。大水。永光。會仙。

二殿地震。冬。以渭龍州首領何公輔尙華陽公主。

辛丑。貞符六年。夏。四月。熒惑入南斗。大饑。民死殆半。

壬寅貞符七年春三月以玉塔員外郎蕭汝翼爲評簿司夏杜安順進白鴉以中書火朱遂良爲中書省令書家以杜安順爲太師輔政時人畏其威凡有獄訟胥吏追不逮者安順命巾車兒追之卽立至時優人戲以一人爲刑部尙書差胥追獄不至曰汝何不稱爲太師巾車兒乎如其言果獲冬十二月壬寅王初御經筵禁不得殺牛不得以黃線縫衣裳

癸卯貞符八年春蟲結窠于二林寺木上色如金銀

甲辰貞符九年冬司蒙柵鄭柵烏米柵叛王命太傅王仁慈討之仁慈以州人范品屯翁仲隘張顏范杜屯沛鄉段松屯可老仁慈直攻蕩沛萬米二柵拔之至羅鑣寨爲獠所襲官軍大敗仁慈奔至安檜山陷於潭爲獠所刺而死山獠相謂曰今日有一婦人爲我所刺亡卒知仁慈已死徧求山澤間果得其屍仁慈宦官也故似婦人雨黑水獻連穗禾藁長七尺五寸

乙巳貞符十年春建寧王龍益帥兵一萬二千餘人伐靈柵山獠以報羅鑣之役軍於杜家村使招諭之首軍丁武官卽丁創等皆降龍益盡擒之武等哀叫從人阮多錦以武等旣被拘囚必當恐懼遂詬辱之而溺於口獠性兇悍遂嚙其陰莖多錦以手擊之武失口多錦亦仆地幾死於是龍益使官職作木魚箝武等口杖殺之而脯其屍季夏暴風大起二寺門地裂

丙午貞符十一年夏四月獲白象賜名天資象乃改元爲天資嘉瑞元年駙馬郎保貞侯杜直獻玄鹿
丁未天資嘉瑞二年仲夏太廟震秋西域僧至王問其所能曰能降虎王命祇候奉御黎能長館之遣人

捕虎以試其術旬餘僧謂能長虎可伏矣能長以聞王命築檻於永平閣使僧入檻僧方禹步誦呪向虎前以杖扣其頭虎格執其杖僧因奏曰有惡人解臣呪術請復加持然後行之王從其請僧復加持久之王欲窮其術一日命僧復入檻虎乃跳梁搏噬僧恐懼退卻莫知所爲倚檻而死仲冬熒惑見

戊申天資嘉瑞三年春二月丁卯朔日有食之獻白鴉夏造聖儀宮季夏地震大暴風太師杜

安順卒以太傅吳履信輔政秋古宏甲叛

己酉天資嘉瑞四年春二月朔日有食之夏日月色赤如血地震王命太傅吳履信都官郎中黎能

長按少師莫顯績訟能長等畏顯績不敢推究國人嘲之曰吳輔國是蘭黎都官是擊按一訟莫績但踞

躄而已時王尙幼顯績通於太后故當時畏之蘭擊二狂人名大俚僧惠明戒日等來朝

庚戌天資嘉瑞五年春二月太后薨諡靈道三月地震詔流莫顯績於歸化寨太傅吳履信卒以太傅

譚以蒙輔政

辛亥天資嘉瑞六年真臘國來貢以都官郎中黎能長爲左輔鄧秀父爲參知政事冬十二月熒惑犯

太白

壬子天資嘉瑞七年春正月清化古宏甲叛初甲人先見牛跡緣於菴羅樹尋跡視之見白牛在樹上復以

他岐而下入於江中因忽不見州人占曰牛在下之物而在木上乃下而在上之象因相率以反是夏詔

譚以蒙發清化府兵擊古宏甲以蒙命多伐蕉江中以礙賊船賊縱橫不復成陣以蒙急攻大破之擒其

黎晚等檻歸京師。詔晚等上木馬。冬十二月。迎蟾宮火。疏蘇歷江。築石塘。濱州胡蝶叛。以蒙討擒之。

癸丑 天資嘉瑞八年。

甲寅 天資嘉瑞九年。春。真登州首領何黎叛。命譚以蒙討擒之。仲夏。永壽殿金龍頭發光。秋。七月。以金

銀塗梵王帝釋像。安置於二寺。設競渡宴禮於後宮。冬。觀魚於晦。是日雨雹。大如馬頭。死者甚衆。

占城真臘來貢。

乙卯 天資嘉瑞十年。春。二月。王御大興門。設廣照燈會。己巳。御天安殿。設春筵宴禮。地震。五月。地又震。

真臘來貢。大疫。

丙辰 天資嘉瑞十一年。孟秋。戊寅。明離閣震。孟冬。試三教子弟。辨寫古人詩。運算。賦。詩。經義。等科。賜及第

出身有差。

丁巳 天資嘉瑞十二年。春。三月。幸龍水海口。造迎蟾宮。及行宮百餘所。秋。詔國子入學。進譚以蒙爵爲

列侯。

戊午 天資嘉瑞十三年。譚以蒙言於王曰。方今僧徒頗與役夫相半。自結伴侶。妄立師資。聚類羣居。多爲穢

行。或於戒場精舍。公行酒肉。禪房淨院。私自姦淫。晝伏夜行。有如狐鼠。敗俗傷教。漸漸成風。此而不禁。久

必滋甚。王可其奏。以蒙召集境內僧徒。留於穀倉。度其知名者數十人。爲僧。餘悉還俗。王幸錦潭。

觀魚。秋、左武勝廊震。王御天慶殿。治判上林院獄。孟冬、輔國太傅譚以蒙決都護府獄於畫關外。涼州產白錫、綠銅、大青。

己未。天資嘉瑞十四年。春、二月、王幸清化府。觀捕象。夏、地震。秋、省試學生。後宮火。以蒙獻白鴉、白雀。

庚申。天資嘉瑞十五年。仲春、王幸玉山寨。觀捕象。季夏、地震。秋、設競渡燕禮。

辛酉。天資嘉瑞十六年。

壬戌。天資寶祐元年。春、正月、改元。羣臣請王加尊號。夏、六月、地震。冬、十月、王幸海清行宮。每夜則命樂

工彈婆魯唱調。擬占城曲。其聲清怨哀切。左右聞之。皆泣下。僧副阮常曰。吾見詩序云。亂國之音。怨以怒。其政乖。亡國之音。哀以思。其民困。今主上巡遊無度。政教乖離。下民愁困。至此愈甚。而日聞哀怨之音。無乃亂亡之兆乎。吾知車駕此還。不再幸其宮矣。後境內大亂。果如其言。

癸亥。天資寶祐二年。正月、造新宮於寢殿西。中置天瑞殿。左起陽明殿。右起蟾光殿。前安正儀殿。上構敬天殿。塔曰麗瑤。中啓永嚴門。右啓越城門。塔曰銀虹。後啓勝壽殿。上構聖壽閣。左構日金閣。右構月寶閣。周圍設廊廡。塔曰金晶。月寶閣右置涼石座。閣西起浴堂。後構富國閣。塔曰鳳簫。後起透垣門。養魚池。池上構玩漪亭。亭三面樹以奇花異木。池水通於江。其雕飾之工。土木之麗。古未有也。初敬天閣成。有鵲巢其上。而產雛。羣臣因之諫曰。昔魏明帝始構凌霄閣。有鵲巢焉。高堂隆曰。詩云。維鵲有巢。維鳩居之。今宮室

初成而鵲巢之。臣愚以爲有異姓居之。臣願陛下遠鑒高堂隆之言。先務克己修德。後乃與其工役可也。王默然良久。以問宦官范秉彝。范秉彝曰。閣成而鵲巢。有產其雛者。此天錫陛下本支百世之休徵也。王悅。命促修之。百姓由是益困。秋七月。知又安州殿前指揮使杜清及州牧范延等上言。占城國主布池。爲其叔布由所逐。以備瀾二百餘隻。載其妻子。寓於几羅海口。欲以求救。八月。王命輔國太傅譚以蒙。樞密使杜安等。往議其事。以蒙至几羅。杜安曰。布池有船二百隻。狼子野心。不可盡信。諺曰。蟻孔潰隄。寸煙燎屋。今布池之衆。豈特蟻孔寸煙之謂也。願公思之。以蒙以語清延。使爲之備。清延曰。彼以難而求救於我。宜推誠相恤。今乃反見疑貳。無乃不可乎。以蒙怒。遂引軍還。清延相謂曰。我等已忤輔國之心。必有後患。不如反襲布池。以爲自全之計。謀泄。反爲布池所覺。池懼。乃謂其衆曰。我等以難而來。求救於大國。旣無郵鄰之義。反欲虜我爲囚。痛莫甚焉。因伺間以誘清延。清延使又安人繫舟於占城。備瀾以守之。占城人夜以竹炬置槍匿船中。一夜守者疲困。撤備而臥。占城因燒火炬。投於其舟。守者驚起。莫知所爲。皆投於水。爲占城所殺。及溺死者二百餘人。清延軍大潰。而布池率衆亡歸其國。九月。大黃人費郎反。先是。大黃人築大城門。聞林邑陀某邑已叛。遂率衆逃歸而反。上將軍阮保良。吏部尙書徐英珥。劾奏以蒙蠱國害民。莫此爲甚。詔降以蒙爲大僚班。初。保良造聖日閣。稽期。以蒙怒。命笞之。保良佯爲痛甚。不能起。以蒙叱起之。保良曰。杖痛如此。安能起乎。中心積怨。乙未。以祇候奉御陳馨爲元師。領兵討大黃。仍命吏部尙書徐英珥率清化府兵以討之。甲寅。英珥次路沛江口。陳馨與費郎遇。兩軍交戰。英珥救之。皆

敗爲郎所殺。

甲子天資寶祐三年。命輔國太保杜敬修討大黃。敬修怯懦。不敢深入。乃屯於越灣。分軍進攻諸道。而敬修但往來章山安老間而已。又上書言盛夏暑熱。師老糧絕。王乃召還。五月。又命關內侯杜英允討之。又不克引退。黃龍見於聖日。開八月。又見於聖壽殿。飛繞御寢門。及於天瑞殿御座。遺爪跡殆百餘所。又見於後宮者三。引其宮女黎娘置於殿頭。十月。命以蒙將諸道兵築壘。自婆溝徑以北。沿路江口。抵文雷寨。以禦大黃人。大風。

乙丑天資寶祐四年。初以蒙築壘成。作樓船數十艘。命富良弩手居其上。以長索繫船尾。令之曰。賊至。則撐船過江而射之。如有不利。則挽其船以回。及以蒙被召還京。大黃人率其黨屯於北岸。戍人如以蒙所教。大黃人岸上鼓譟。挽船卒見其勢甚盛。各自驚怖。棄索而走。船薄賊岸。而弩手盡爲所殺。官軍大潰。費郎等恃其數勝。遂率志士蠻獠官鎗等。攻拔一帶鄉村。焚應豐行宮。及倉穀部落屋宇殆盡。後至蜆洞。爲洞人邀擊。大破之。秋八月。王命侍衛都火頭阮謂往招諭大黃人。謂至費郎與其豪長一百七十餘人出降。九月壬辰。改元爲治平。龍應元年。是月覽山崩。黃龍見於勝壽殿。天瑞殿成。賜羣臣三日燕。以落之。王頗徇於貨利。以賣官粥獄爲事。諸兩人相爭田地產物。而一人進納者。不問其情理曲直。皆以沒官。故府庫財貨山積。而百姓咨怨。盜賊蠭起。

丙寅治平龍應二年。春正月。王御敬天閣。觀拋飛團。二月壬子朔。日有食之。三月奉天宮火。夏五月。

造聖勳寺。冬十月重修眞教寺。是歲境內既亂而王頗好遊幸。道塗梗阻無所可適。乃於應明池別爲應豐海清行宮。日率近臣宮女以遊觀爲樂。又以巨舟爲御舶。以小舟爲兩隊。使宮女伶人發棹而引其左右。以倣行幸之儀。又以蠟封匹帛及海物之類。沉於池中。令人入水取之。以爲龍宮所獻。羣臣見其遊蕩無度。皆畏懼莫敢言。伶人武高詐謂上品奉御鄭寧曰。適高過透池邊。見一異人。執手遵池而行。至菴羅樹下。忽引入水。高懼其溺。不敢前。頃之水忽自裂。行至一處。見其宮殿顯敞。侍衛甚嚴。高問是誰所居。其人曰。卽吾所居。以管攝於此池也。遂具杯盤與高對飲。酒闌。高謝求歸。其人惠以檳榔。送至菴羅樹下。因忽不見其人。而手中檳榔已化爲石矣。乃知池中有神物也。寧驚異具奏於王。王雖聞其言。略無畏懼。乃使以鐵厭之。至冬月。池水涸。王謂左右曰。有能以江水漲溢於此者。吾必厚賞。佞臣陳宿曰。臣能之。王以爲然。使行其法。竟不驗。一日。王幸於此池。聞城外有爲剽掠者所叫。而尙耽於遊逸。佯爲不聞。王性畏雷。每於動止之間。便生驚怖。近臣阮餘自言有降雷之術。會雷鳴。命餘降之。餘仰天誦咒。而雷聲愈厲。王詰之餘曰。臣戒之久矣。豈意彼猶強暴如此。

丁卯。治平龍應三年。大黃人費郎復反。攻雜字邑。三月。國威州賊段可列王滿反。夏。四月。譚以蒙復輔政。秋。八月。段尙。段主。反。王命大發兵攻之。譚以蒙出大通道。保貞侯出南冊道。上品奉御范秉彝出可了道。祇候火頭陳馨出扶帶道。欲會攻尙。尙密遣人賂上品奉御范猷。請以其衆歸猷。猷爲力請於王。王遣使召以蒙等軍還。尙遂得脫。自是以蒙秉彝與猷有隙。是歲。王見盜賊蠭起。乃追悔前過。因下詔曰。朕

幼膺大業。深處九重。不知民事之艱難。自納小人之言。以取怨於下民。旣胥怨朕。將疇依今。其改過自新。與民更始。諸有地產業之沒於官者。悉還之。

辰。治平龍應四年。大饑。餓死者相枕。冬十月大水。十二月。宋祿州人韋智剛攻諒州。以范猷知又

安州軍事。猷言於王曰。方今天下擾亂。姦賊輩起。或有與臣妬寵。私爲暴亂。雖臣之首領。不能自保。況陛下之恩德乎。願少加聖慮。容臣使得選其壯勇。以自備。庶免不虞之禍。王然之。於是猷乃招納亡命。鳩聚盜賊。號曰候人。公行劫掠。無所忌憚。盜賊因之蠶起。而國威人亦率其徒屯於西結。文雷寨人屯於拖幕江。自此道路阻絕。舟船不通。王命上品奉御范秉彝將藤州人禦之。而猷又歸古蔑鄉。與烘人尙主等會攻藤州。藤州人請秉彝攻猷。不克。乃還。

己。治平龍應五年春正月。秉彝復帥藤人快人攻猷。秉彝數敗。秉彝怒。斬其走者以狗。它日復戰。克之。猷奔於烘。秉彝籍其家而焚之。猷與秉彝愈增怨惡。猪洞人阮破鄰領其部曲。夜盜隊舍官府財物。宋韋智剛復攻諒州。戌時。日夜見。三月。日晷忽冥。移時復見。丁未。秉彝又攻烘人尙主於衛橋。烘人潰。主陷於濼。爲何文雷所刺。王命祇候奉御陳馨徵猷歸京師。秋七月。秉彝至京師。將入奉事。有止之曰。王旣先入猷言。怒公未解。秉彝曰。吾事上盡忠。而反爲人譖耶。況有君命。吾其焉逃。遂入。王使執之。及其子輔。囚於水院。欲加以刑。其將郭卜等聞之。領兵鼓譟而入。至大成門。爲闔者所拒。卜等刮其扉而入。王聞事急促。召秉彝入金晶塔涼石處。俄而猷與其弟京等。皆自御堂出。以御槍殺秉彝及輔。卜等聞

乘彝死。遂使軍士突入涼石處。以王所御巾車。昇乘彝屍。以御席裹輔屍。由越城門出。下朝東步。既而復入萬延宮。逆王子忱。王子崑。歸於海邑。壬寅。我元祖大帥舟師詣京師。逆王子崑。并母元妃譚氏。及同母妹二人。歸於海邑段氏家。遂於其家奉王子忱卽位。時崑家臣劉紹。就元祖及遙濠人范愚言曰。忱雖長子。庶也。崑雖少嫡也。唯二公圖之。元祖遂與愚逆。崑歸茫仁卽位。徽稱勝王。降忱爲王。頃之。崑復歸於海邑。寓劉家村館。以我元祖仲女爲元妃。以譚以蒙爲太尉。阮正吏爲參知政事。元祖爲明字。愚爲上品奉御。蘇忠嗣爲殿前指揮使。餘各有差。王命猷往烘路訓練軍士。欲伐順流人。會烘人來迎。及期而猷尙與天極公主私。不覺移時。遂與烘人相失。猷乃登舟。由江路而去。次古州步。陸行至麻浪阿杲社。爲北江人阮耨。阮乃所執。送於王子崑殺之。秋。八月。順流快以乘彝之死。大率舟師攻京師。前軍泊於東步。由左掖門直入禁中。盜取寶物。大軍泊天河步。欲從千秋門入。至雨師觀。爲列侯高舸伏於軫圍。射一卒中。乳舸爲之撫掌。諠譟。士卒奔北而還。船人疑有官軍來攻。皆撐舟離岸。遇北風疾吹。盡爲漂散。二軍聞舟船已失。皆自奔潰。京城人追殺之。死者三百餘人。

庚午治平龍應六年春。正月。勝嚴寺地裂。蘇忠嗣自以私受王子崑封爵。恐罪及已。乃勒兵攻快人。因就

海邑執王子崑等。歸於京師。丁未。王命上品奉御杜廣如忠嗣家。逆王子崑。王子崑署官者皆逃去。以蒙竄於安朗鄉。因與其屬謀捕諸受王子封爵者。以贖其罪。因移檄募諸道兵。分爲五隊以攻之。以蒙領茄人及清化府人攻卽墨鄉。爲其所敗。於是諸道兵聞之。皆引退。秋。七月。以蒙收所受王子封爵者二十

八人以獻。杜英允當門數之曰：汝爲國大臣，旣懷無君之心，私受賊子封爵，今反與吾並列，吾雖不才，復何顏與汝相見，以蒙慚懼而退。彗星出，冬十月，王不豫，壬午，王寢疾，忽見二青衣執杖立座側，王問執杖者爲誰，左右曰：無所見。是夜王薨於勝壽殿，年三十七。廟號高宗，在位三十六年。葬天德府壽陵，改元者四。

惠宗

諱吳，高宗第三子也。母元妃譚氏，以治平龍應六年十月卽位於柩前，尊號曰資天統，御欽仁宏孝皇帝。尊母譚氏爲太后，同聽政。十一月，殯高宗於崇陽殿，王與太后及羣臣皆除服。己酉，順流，明字陳嗣慶帥舟師次細江步，請其舅蘇忠嗣同赴高宗之喪，忠嗣亦相疑貳，嗣慶乃回軍。是月，王使迎陳仲女，嗣慶不應。以太傅杜敬修爲太尉。十二月，祇候奉御杜廣等執敬修送於忠嗣，沉之大通步，以敬修謀殺忠嗣故也。丁巳，忠嗣聞關內侯杜世規與祇候奉御杜廣、小侍衛人火頭費例謀廢立，因引軍至興聖菴，遇廣例欲襲之，以廣例軍衆乃陽與謀，曰：主上初喪，民情未定，盍各屏兵甲，自詣朝省，同謀協力，以匡王室，不亦善乎？廣例以爲然，遂許諾。會日暮，約以明早。是夜，忠嗣更增軍士，多於前日，欲圖廣例。明日，廣例如約，先會於秘書閣，以待忠嗣。忠嗣至，四達亭，先遣裨將陶判將兵由右掖門入屯沙墀，龍墀使阮字阮拖羅屯千秋門，時例方飯，見列侯高舸，命之食，舸曰：事急矣，食可乎？例問故，曰：忠嗣軍士倍於前日，欲圖子矣。例乃投箸而起，執戈就龍門窺之，見陶判軍鼓譟而入，例進擊，殺一人，退保門內，又聞千秋

門有屯軍。遂由越門出。延具門。爲判軍所追。例以戈擊之。又殺一人。判軍少止。例至千秋門。遂脫。判引軍襲世規。世規竄於高宗柩下。求之弗獲。忠嗣執其守殯闔。豎問世規所在。豎猶畏世規。乃佯以手加額而指之。隨指而求。乃獲世規。忠嗣命斬於東市。先斫二脛。次解胸脊及臂。世規神色自若。後剖其腹。乃死。是日忠嗣收小侍衛人譚入。殺於長廣門外。以入附於王子忱。杜廣亦殺寄班武利於門外。己未。以忠嗣爲招討大使。譚以蒙爲太尉。辛未。詔斬杜英允、尹亨、阮元、阮仁於封坡。進以蒙王爵。

辛未。建嘉元年春。正月。王復使迎陳仲女。嗣慶不應。乙丑。選文臣爲都護府士師。癸酉。復迎陳仲女。嗣慶使內殿直馮佐周。與其裨將潘隣、阮硬。送仲女於京師。會忠嗣與廣戰於朝東門。乃泊於大通步。已卯。忠嗣假兵於鄰。硬、廣軍大潰。閏月。獲廣等。庚寅。立陳仲女爲元妃。辛丑。王與太后御景延門。聽杜廣訟。廣等七人皆斬。三月。以招討大使關內侯蘇忠嗣爲太尉。夏。四月。葬高宗。阮字偏將阮訖告。忠嗣曰。字欲殺公女。墜阮麻。避因而反。忠嗣怒。奪字兵權。字懼。奔國威。六月。忠嗣夜如嘉林第。與天極公主私通。爲其夫關內侯王尙所殺。時字聞忠嗣已死。乃還京師。夜帥部黨盜御府貨物。王怒。詔捕字甚急。字竄於枯柵山獠。數月。衣食窘乏。將謀歸。嗣慶至灘邑。邑中父老遮道請留曰。此地困於山獠久矣。明公苟能少留。則一帶邑皆蒙全活。其德公者不少。字乃決意居之。大會邑人。屠牛歃血而盟。喻以利害。衆皆許諾。字以其得衆。乃引兵攻破山獠。斬首而還。又爲莽人數十餘。各執火炬。夜置山獠柵。使人守之。戒曰。汝見山獠屋火起。則速燃其炬。而誼譟。夜半。使阮局焚山獠屋。守者見火發。亦燃其炬。而譟。山獠驚起。

倉皇欲拒戰。疑前後兵衆不敢出。俱向柵前而射。又恐字引兵至。乃降。自此一帶郡縣皆爲字有。阮麻遜以忠嗣之死。往說我太祖。請進兵安輯快諸邑。麻遜與其妻蘇氏登舟。欲如順流。道遇忠嗣將阮貞。爲所殺。遂虜蘇氏以歸。蘇氏使人訴於太祖。太祖怒貞非義。遂謀圖貞。嗣慶葬忠嗣於穫鄉。太祖次海邑。使召貞。貞不至。乃使蘇氏誘以殺之。烘人攻黃點隘。嗣慶使賴靈率兵與快將阮堂拒之。堂爲守隘人所擒。以致於烘。嗣慶怒。決江水灌諸邑而還。快人失望。歸附於烘。尙與文雷乃譖嗣慶於王曰。嗣慶將發兵赴京師。欲圖改立。王怒。秋七月。詔諸道兵討嗣慶。降元妃陳氏爲御女。烘人段尙。段文雷。引兵會師。詔進尙侯爵。太傅戶部。詔譚以蒙復聽政。嗣慶引兵伐麻雷人。丁感敗之而還。冬十月。嗣慶復伐其邑。先攻隊山。殺獲甚多。感奔山獠。烘人攻南册。范武等降之。使其將段持耒守之。持耒不能招集其衆。爲武所襲。殺持耒於芮邑。烘人又率衆渡江。攻南册。南册入竄於奇特山。武縊而死。南册人使求救於嗣慶。嗣慶使其將丁瑰將兵擊烘。烘人敗走。又經略諒州。至三峙山。盡有其地。十二月。嗣慶大發兵。次細江步。太后聞軍至。疑有廢立意。嗣慶乃翦髮誓天。又使天貞公主奏言己意無他。太后亦不之信。太后夜令收仁國王及王子第六郎第七郎。並沉於御堂井。以杜改立之萌。旣而使舁其屍。積於琳光宮門外。侍臣皆畏太后不敢視。惟小官鄭道哭之甚哀。曰。先君焉往。使三子如是乎。高宗初薨。童有謠曰。高宗葬未畢。三屍積爲一。

壬申。建嘉二年春正月。王及太后幸冷涇洲。百官就其洲迎駕還宮。順流明字陳嗣慶。與阮字會於朝東。

步誓爲刎頸交。盡忠報國。共平禍亂。乃分大江之兩岸。各自統率。自上塊至那岸。沿北江道及陸路鄉邑。屬於嗣慶。自京岸至烏鳶。屬於字期。以三月會攻烘人。庚戌。進嗣慶侯爵。諡彰誠。以太后弟譚經邦聽政。嗣慶還細江步。丁瑰攻諒州。降之。掠天極公主家財物而去。二月。字攻吉利人吳賞于武高。爲流矢所中。乃還居西陽巷。旬餘。誤與婦人合。毒氣復發而卒。王使人招撫其衆。爲其佐阮局所殺。王大怒。自將討局于西陽城外。至普喜巷。官軍大敗。失王所御寶劍。王策馬而還。至箸作巷。乃脫。王與太后幸東岸。大僚班杜賞第。欲幸諒州。嗣慶聞之。乃引軍至京師。使其將賴靈、潘鄰等兵至賞第。迎車駕還宮。王驚疑。是夜幸諒州。靈、鄰等執鞚叩頭。請留乃止。明日。彰誠侯陳嗣慶次東岸步迎之。乃還。駐駕於慈調步。嗣慶使人洒掃聖儀宮。車駕居其宮。王與太后詣佛前誓曰。朕以菲德。忝嗣瑤圖。致遭亂離。將墜前業。以至宮駕。屢爲播遷。今欲遜於天位。以讓賢德。言訖。引刀欲剪其髮。嗣慶及羣臣皆叩頭流涕。乃止。庚午。車駕還宮。彰誠侯嗣慶次於鶴橋。是日。命文武百僚皆聽命於彰誠。夏四月。嗣慶攻烘人於池邑。冬十二月。譚經邦等以內明字尹信翊罪狀聞於嗣慶。嗣慶怒。發兵傅龍城。使殿前指揮使阮硬將官職都入禁中。大呼曰。信翊阿諛上意。瀆亂國經。出入樞庭。不明名分。臣請除之。毋汙清議。信翊大懼。乃竄於香閣上。硬突入。捕送於嗣慶。繫鐵索五重。送於美祿館。

癸酉。建嘉三年春。正月。太后密遣小侍衛火頭王常。徵扶樂道將潘世。北江道吳乃等。約以是月甲寅。共發兵襲嗣慶。甲寅。常、世等進襲嗣慶軍於大興門外。欲因之。遂入後宮。擒其母蘇氏。范市知其謀。乃潛將蘇

氏踰城登舟而遁。時軍中不設備，見乃至，皆奔潰。嗣慶在大通步，不之知。辛酉，嗣慶引軍入禁中，焚馮蟾橋，回軍大通步。嗣慶使人如北江，召其將阮嫩，嫩至，繫以鐵索五重。壬戌，王命上塊營太尉王以蒙及烘俟段尙皆來會，王命尙及以蒙攻嗣慶。二月，王自將擊嗣慶於米所。嗣慶攻國威州，降之。三月，王與太后還聖儀宮。乙丑，嗣慶縱信翊歸京師，因厚賂而謂之曰：「公此歸，善爲吾言於兩宮，明其始終，臣節勿聽小人之言，使子得以保全性命。」信翊至京，王問嗣慶，信翊言嗣慶有篡逆之心。王與太后益忌之。庚午，王太后還大內。夏四月，王命以蒙往井州，三帶江諸軍以攻嗣慶。五月，丁卯，越城門震。六月，正儀殿震。秋七月，以尹信翊復爲太傅，進侯爵。南冊人范以等擊丁瑰走之。九月，嗣慶開阮嫩鐵索，嫩爲人狀，貌瑰異，襟量倜儻，雖居縲絏，神色自若。見勇士跳距，帶鐵索跳之，過於勇士。嗣慶見而異之，復以爲將，以母姨之女妻之，仍授以神溪，个屢二邑。嗣慶將丁瑰反，嗣慶執而殺之。

甲戌建嘉四年正月，彰誠侯嗣慶會諸道兵，盟於東扶，列杜太尉祠，欲攻京師。嗣慶分水陸二道，潘鄰、阮嫩將國威兵，由平樂道攻陸路。嗣慶自領舟師，次拖幕江。我太祖及嗣慶攻瀘江右岸，陳守達、陳獻琛、阮硬攻瀘江左岸。王犁、阮改、攻朝東步浮梁。王自將討嗣慶，會大霧，黑昏，舟人莫辨。至米所，遇犁改軍，未交戰。犁改鼓譟勒兵，官軍自潰。軍士皆棄舟登陸而走。犁改獲龍舟，我太祖欲進攻瀘江右岸，至安沿步，遇譚以蒙及安仁王領北江道諸軍來，悉以銳師逆戰。二軍皆敗，守度、獻琛等乘勝進至慈調步，又克之。隣等遂至椰市，遇烘將段禁、武忽等擊之，皆敗走。度東步浮梁而歸。時王在茶亭，聞諸軍皆敗，大懼，命駕入禁

中迎太后共上船欲奔諒州。當過天德大室。以蒙慟哭止之曰。諒州道路遼遠。地多瘴氣。非其所安。今陛下避難而適彼。譬如逃熱而趨火。有何益乎。願少留於此。使臣等率烘人復與彼戰。以爲後圖。萬一不利。然後行幸。亦未爲晚。王從之。以蒙召烘人不至。因奔於烘。上深以爲憂。己卯。幸諒州。車駕至芮曳鄉。阮順第少歇。是夜又行至多感鄉。鄭農家。農進膳。食畢。又去。宿朱麻洞。陶年。第嗣慶在鶴橋。分命將帥。招撫諸道。新集兵。賴靈守義住。潘鄰守超類。守度守朗隘。范茹守貧隘。阮嫩守北江。時守度遇烘人段尙。段文雷。段可如。兵與戰。烘人奔北。王聞嫩守北江。遂命安鐵將申長。申荃等拒於芮曳原。並爲嫩所殺。王乃與太后奔於牧寓關內。侯王尙第。數日。嗣慶乃剪髮。使人以獻於王。及具言己意。謂臣見羣小在側。壅遏忠良。蔽惑聖聰。民情鬱抑。無由上達。故因國人之怒。起兵以討此輩。剪除禍根。以慰衆心耳。至于君臣之分。不敢少犯。豈意深負專征之罪。致使車駕播遷。自揆臣身。罪當萬死。願陛下少霽威怒。返駕京師。以副人望。王不省。嗣慶又使譚經邦。率百官備法駕迎王還京。王欲從之。羣臣皆喜。信翊言於太后曰。彼人久蓄異心。欲設計以俘囚耳。何謂迎耶。願陛下再三思之。太后然之。明日。王命駕還。入白太后。太后曰。王以國家之重。不得不歸。老母將何歸乎。王知太后無還意。遂與之幸古弄。經邦等皆遮道攀馬。首涕泣曰。京師方所觀望也。舍此不歸。欲將何往。又曰。臣觀嗣慶之心。忠赤無二。陛下何疑焉。王油然下駕。謂羣臣曰。國家不幸。遭此多故。今太后遠涉艱險。朕其敢離朝夕之省。問哉。促駕而行。時扈蹕者多散去。唯內侍判首陳欣等三十人與俱。王與太后登舟。幸三峙山。寓黃伍舍。久之。以水土不便。乃退次湯步。是夜稅駕於象

奴村二月辛未車駕入鳳山旬餘復還南冊。戊申彰誠侯嗣慶召諸王及百官議改立乃使人迎英宗子惠文王赴鶴橋立之。是日收太后族譚經邦等並加鐵索囚於美祿。癸亥盟國人於龍墀三月惠文王卽位於天安殿改元乾寧號元王。是日大雷雨。烘人段軟攻北江東定山東究人不設備見軟來以爲大軍齊至遂大潰軟素勇悍得勝益驕遂焚屋舍殺掠雞犬殆盡因解甲登山寺撞鐘爲樂時諸寺戍人皆撞鐘嫩聞鐘以兵邀而擊之殺軟等嫩乘勝追之至法橋爲烘人段宜伏於橋下以戈擊之透鐵甲傷背引兵而退初嫩以東究與烘接境恐烘人掩襲救之不及預戒戍卒曰見烘人則各撞寺鐘以爲警急令嫩聞而來救至是軟誤撞寺鐘故爲所敗。夏四月甘蔗將軍潘具反嗣慶囚之於美祿甘蔗將軍杜備反嗣慶使潘隣捕之爲其所敗復使賴靈往救之又敗太祖以二軍之敗乃自將擊之不克而退。北江阮嫩反嗣慶因歸其妻嗣慶殺義信王於饗潭以其與嫩通謀是日嗣慶發兵略官府金銀貨物因迎元王赴利仁行宮使賴靈焚京都宮室十九所。嗣慶次大通步築壘於義住。嗣慶將潘隣欲舉兵應嫩謀泄嗣慶斬於大通州。六月嗣慶攻嫩於聖儀宮焚其宮。丙午王與太后自南冊回宿於太室是日以北江道將軍阮嫩爲侯。丁未至大內太后密詔扶樂道將軍潘世誘烏金侯阮八殺之擊八傷頰賴上卒急救遂免。秋七月戊辰詔築壘自萬春城門至蓋市以禦嗣慶。八月北江侯嫩攻烏金侯八於西陽橋。己酉嗣慶使譚弼獻土物。九月嗣慶使阮硬送經邦還京師具言已意無他王聞硬至益懼遂幸番琴巷尹播家硬去乃還宮。壬寅試僧官子弟。癸未左輔阮正吏擅取武庫器械詔捕

之。正吏懼，奔北江。丁亥，嗣慶引兵犯闕。王與太后幸兵會。是日，嗣慶縱軍士虜御府財物，因焚其宮室及京城人家殆盡。己未，王與太后還京師，見宮室盡爲焚蕩，遂次泰和橋側，祝聖祠，使築茅屋居之。
乙亥，建嘉五年春，正月，詔曰：陳嗣慶聚兇黨寇攘京師，水陸戰攻，痛關宗社，爰於去冬，虐燄逾熾，率彼師徒，肆行貪虐，虜掠我財物，焚蕩我宮室，以至京城巷陌，化成灰燼。朕因億兆臣庶之怒，賴一祖六宗之靈，躬舉六師，親行征討，咨爾將帥之衆，士卒之徒，咸聽詔言，各盡乃心，用塞朕意。嗣慶引軍屯究連，分其將士屯九臯，究翁以禦嫩，仍遣快路將軍阮堂、阮毗，守地民堂，毗復與嫩通謀，以攻嗣慶。嗣慶又使賴靈守安沿扶列，自往攻堂、毗及嫩。王使人攻安沿扶列，克之。二月，封北江侯嫩爲王。義住人朱停以其邑附嫩。三月，嗣慶攻快鄉，拔之。堂與其子吐出降，於是嗣慶遣堂、毗、築黃壘，安喇築安家壘，楊慈築公主壘，嫩又攻喇及堂、毗，皆克之。嗣慶聞堂敗，乃引兵救之，仍使其將守慶獻琛、陶屯，於欄橋攻嫩，將費探敗之。五月，嗣慶以其妹陳三娘妻於堂。王謂羣臣曰：朕欲遜於位，卿等以爲何如？羣臣皆涕泣止之。王不聽，乃與太后引刀剃髮。是日，王自泰和營幸張耕鄧老第，回駕西陽橋，紙作巷內，寄班杜安宅。嗣慶攻大黃軍潰，其將阮堂溺死。秋，七月，嗣慶焚洞仁宮。王使迎靈仁太后神主，歸於祝聖祠。冬，十月，聽上林院獄。十一月，嗣慶送還平天冠。十二月，構草殿於杜安宅。
丙子，建嘉六年春，正月，王與太后御草殿視朝。嗣慶還金椅。三月，兩雹。王命捕劫人於機舍巷，爲杲將杜乙所擊。王命召乙，乙不應，命顯信王八討乙，乙終不服。五月，杲將杜芮攻王。戊午，王幸外寨，因遣使

請兵於嗣慶以討芮。芮奔於嫩。己巳。徙列侯杜芮爲犒甲。甲辰。王與夫人陳氏夜如順流軍。歸嗣慶。天明。遇其將王黎以舟來迎。時太后及王子公主皆遜於烏金。嗣慶見王大喜。將士皆歡呼鼓舞。自是王與嗣慶決意攻北江。王嫩顯信王人烘人段文雷歸化何高等。甲申。太后至安唱。時嫩高以太后命攻慈廉諸邑。皆拔之。庚戌。嗣慶起草殿於西扶列。其規模一徹大內。顯信王阮八降。詔明字馮佐周爲招討使。甲辰。王次於慈廉。命嗣慶討嫩。詔徙嫩爲兵。秋。八月。顯信王八反。陷兵合邑。將杜細奔丹鳳。冬。十二月。進我太祖爵列侯。馮佐周賴靈並關內侯。以嗣慶爲太尉。贊拜不名。太祖長子柳爲關內侯。嗣慶長子海爲王。又以太祖爲內侍判首。每大宴禮。賜坐局天安殿。

丁丑。建嘉七年。夏。四月。太尉分諸軍爲六道討嫩。嫩引兵出其不意。擊范恩。恩軍陷於冷涇潭口。爲嫩所殺者五十餘人。嫩乘勝復襲隘道。遇太尉軍交戰。嫩軍遂潰。王御涼石座。聽范恩敗軍訟。貶恩小侍衛人杖八十。仲夏。烘人段尙舉衆降。封尙爲王。太尉引兵攻峯州。真那其口皆拔之。丁卯。峰州諸屬邑皆出降。太尉復引軍攻顯信王。八克之。八奔安樂柵。自此一帶鄉邑悉平。起萬歲山五峰。永壽殿火。

孟冬。甲寅。夜地震。王觀魚於隊山。

戊寅。建嘉八年。仲春。以麻論柵山獠明字白浪爲列侯。孟夏。幸究連州。觀捕魚。戊寅。幸舊京。食荔支。詔諸獄案成。先令審刑院官預加考訂。然後聞奏。己未。地震。我太祖領諸道兵。圖嫩於北江。仍命決其隄。以灌諸鄉邑。賴靈隨其水勢攻之。嫩軍大潰。獲嫩妻子。嫩以百餘人退保扶寧。是日。太尉引兵至弩。

驛歇坐。戲指木上小枝謂左右曰：吾爲君等射中此枝。一發而中。衆皆驚服。坐頃。其驛爲頽。壓覆太尉。衆大懼。撤尾木以出之。而太尉無恙。以關內侯賴靈知。又安州事。太祖與太尉嗣慶以其妹陳三娘嫁。烘侯段文雷。文雷勇敢有智略。能得衆心。故烘人多歸之。七月大水。

己卯。建嘉九年春二月丙辰。雨雹。乙丑。王聽都護府。訟降上林院士師阮宣及其子鄧分盛爲書家。夏。

六月。以劉炎爲上林院士師。乙丑。王幸舊京。朝東步觀。諸軍攻嫩不克。南册范以卒。初太尉使王犁

等將兵向南册與以會。謀共伐嫩。會以疾篤。嗣慶使醫石章往治之。未至而卒。乙巳。嗣慶發兵往南册道。

遇犁等還。怒其不留。欲刑之。因使將軍阮改、阮木引兵徑至平槁。時嫩已先據其邑。改木力戰爭之。嫩兵

自潰。太尉自陸路向安丁橋。遇將軍自挑。謂嫩兵已傳於安丁洞。太尉使攻之。不克。太尉復攻平槁。南册

將黃个卒。阮利皆出降。南册平。仲秋。王御長廣門。觀秋社。冬十二月。嫩病篤。太尉軍於朝東步。而嫩

已死。庚午。嫩將費探送太后及王子公主等於太尉。以降。嫩大將阮盈竄於侍降險林。逾五日。自度計窮。

乃獻名馬以降。北江平。

庚辰。建嘉十年春正月。以上品奉御陳豹爲關內侯。陳獻琛爲列侯。阮佐時知審刑院事。季春。雨雹。三

月。後宮震。夏四月。太尉嗣慶與太祖等發兵攻歸化寨。何高分爲二道。太尉及太祖由歸化江。賴靈、潘

具、由宣光江兩道俱進。具陷於澤。爲高將阮乃所斬。高聞太尉軍四面圍之。最急。遂與其妻子俱縊而死。

自是上源路三帶江等皆平。太尉以潘具死國。請追封信王。六月己未朔。兩日並見。仲秋。新宮成。

冬十一月王幸扶列步觀鬪舟。

辛巳建嘉十一年季夏惠文王薨卽元王也。輟朝五日。清膳三日。秋九月戊申幸美祿太尉第。

壬午建嘉十二年秋八月彗星見於西南方。孟冬王與太后御天安殿觀太尉子顯道王海納昏禮。九月大水。

癸未建嘉十三年春正月太尉使人收寶信侯賴靈靈縊而死。孟冬太尉伐蒙柵山獠。十二月己卯輔

國太尉陳嗣慶卒於扶列第。王與太后臨其喪哭之盡哀。諡建國王。己丑地震。是冬虎入諸村邑。

甲申建嘉十四年春正月丁未葬建國王於美祿。是春以太祖爲輔國太尉馮佐周爲內侍判首進上品侯。

陳豹爵爲王諡顯誠。季秋自源頭至京師江水赤如血。冬十二月外塞佛跡山裂長三十丈。

乙酉建嘉十五年命太祖討乂安州降之。王御大興門觀設藏鬪詔境內淑女觀之。夏彗星見。六月

王遜位於第二昭聖公主諡昭王尊王爲太上王改元天彰有道。己卯盟國人於龍墀。冬十二月上

王以女王而幼爲憂召馮佐周謀曰朕以不德獲戾於天絕無繼嗣傳位於女以一陰而御羣陽衆所不

與必致悔亡以吾觀之莫若遠法唐堯近體仁祖擇其賢者而授之今所見太尉仲子某年雖沖幼相貌

非常必能濟世安民欲以爲子而主神器仍以昭王配之卿等爲朕言於太尉太祖亦未之信左輔阮正

吏謂太祖曰阮氏之有國也賢君六七作其餘德遺澤入人也深一旦遽以異姓爲嗣意其試之以觀我

何如耳苟因而受之天下必謂太尉實有篡逆之志太祖欲從之上品奉御陳守度曰左輔之言非也假

如上王有子。反欲遜於二郎。揆之於義。則不可奉詔。今以無嗣。欲擇賢而付之。此乃上王遠法堯舜之真讓。又何疑哉。況天位不可久曠。而上王遜避之意已決。別選他姓爲嗣。雖欲不臣事之。其可得乎。且上王以二郎爲嗣。乃天意也。天與不取。反受其咎。願太尉熟思之。冬十二月。命內侍判首馮佐周。內行遣左司郎中陳智宏。將內文武臣僚。領龍舟。備法駕。赴星罍府迎我太祖。以是年十二月初一日受禪。卽位於天安殿。尊順貞王后爲太后。降昭王爲昭聖王后。改元建中。太上王與其母譚太后。出居扶列寺。號惠光禪師。以建中二年八月丙戌。薨於善教寺。廟號惠宗。在位十五年。有奇。改元者一。曰建嘉。凡十五年。壽三十三。殯於安華府寶光寺。

右阮朝自太祖至惠宗。凡八主。始庚戌。終乙酉。共二百一十六年而亡。

附陳朝紀年

太祖

建中元年乙酉

凡七年

天應政平元年壬辰

凡十九年

元豐元年辛亥

凡七年

聖宗

紹隆元年戊午

凡十五年

寶符元年癸酉

凡六年

仁宗

紹寶元年己卯

凡六年

重興元年乙酉

凡八年

英宗

興隆元年癸巳

凡二十一年

明宗

大慶元年甲寅

凡十年

開泰元年甲子

凡五年

憲宗

開祐元年己巳

凡十二年

裕宗

紹興元年辛巳

凡十七年

大治元年戊戌

凡十一年

太王

天定元年己酉

凡一年

睿宗

紹慶元年庚戌

凡三年

今王

隆慶元年癸丑

凡四年

昌符元年丁巳